

普法戰紀

第五冊

U 9
6255
5



79
6255
5

普法戰紀卷五



南海 張宗良 芝軒 口譯
吳郡 王 韜 紫詮 輯撰



自師丹納欵。乘輿蒙塵。法遂為自主之國。至發孚議和。不成。而法京之圍益急。援師不至。旁郡屢失。識者已憂其事不可為矣。而尤甚者。則在士打拉士卜城之亦陷於敵也。普人取是城。在九月二十七日。距發孚之議和。僅六日耳。士打拉士卜在法之亞撒西郡中。亞撒西郡為法境西北隅腹地。襟帶來尼大河。其北境遠足以轉輸京師。其西境近足以控制鄰壤。分為二府。曰下來尼。曰上來尼。士打拉士卜。即下來尼府之首邑也。邑中戶

口不下九萬餘人。其城瀕來尼河濱。垣堞崇嚴。防範完固。共闢七門。其旁別有一小城。爲之犄角。建築如三角形。四周環以垣墉。城外多設兵房。駐以重兵。以備守禦。有演礮場一所。平坦無際。地極宏敞。相距數十武。有一大公所。棟宇鉅麗。瀕江一帶。均立水閘。爲灌輸蓄洩之用。城中列肆連雲。層樓煥日。廣厦崇旃。櫛比相望。附郭鄉村稠密。無不家給人足。戶多蓋藏。室皆華整。與瑞士以大利東界。相隔僅一府。而水道則直由來尼河北。達日耳曼邊境。以是三國之人。皆樂出於其市。往來販運。歲以爲常。卽有時取道內地。亦不甚遠。此誠歐洲之雄鎮。爲普法所必爭者也。得之則強。失之則弱。普之深謀蓄慮。以圖之者。非一日矣。普之始攻士打拉士卜城也。

在八月十有一日。特選健將。以重兵往。兩軍甫交。鎗礮之聲。響震山谷。十七日。遂附城下。普軍環圍四周。以困之。普之副將瓦得。瓦得曾在俄國教習軍士。普法軍興始行調回。統率巴甸兵蘭華兵

及普軍騎隊餘勇。並礮兵一旗。以攻其外。助之者有副將德嘉。副將馬田。爲左右翼。所有軍需。如糗糧器械。皆無不備。法國守城軍士。計二萬一千人。其外城鞏固異常。而向內墉堞。悉依古築。閱時甚久。未嘗修治。守城將軍爲余烈。堅忍有智略。法兵慮不能守。請於將軍曰。此古城也。恐難當礮石。不如獻城納款。余烈將軍不允。毅然作色曰。城中民人八萬。豈將盡驅之以服普乎。惟我職守之謂何。不幾貽敵人笑哉。二十一日。普軍以大礮攻城。環轟迭放。經六晝夜不息。二十六日晨寅刻。有勸

城中人出降。以免兵燹災。其地傳教牧師。願執白幟前往。以爲介紹。且復百端開諭之。衆以未悉將軍意。不果。二十七日。普軍再舉礮攻城。時普之中堅。屯駐於蛙芬勃。近營有小山岡阜環互。上有葡萄園。結實正熟。青紫相間。纍纍然下垂。登山眺望。卽見城中。瞭如指掌。城內有禮拜堂。古時所築。歷來著名。高敞宏巨。轟然特起。上懸天文報時鐘。精巧罕倫。價值不貲。此堂居城之中。正當衝要。普軍屢以礮擊。尙未毀也。時法兵於城外守禦。設塹三重。環城爲長圍。以拒普軍。二十九日。普軍攻取第一重圍。以礮攻西北礮臺。三十一日。普軍鑿地道已成。遂入第二重圍。取之。築土爲壘。建礮其上。攻城之內隅。九月二日。法軍整頓隊伍。由城出戰。分左右翼以攻

普軍。兩軍相接。皆殊死戰。俄而法軍左翼。爲普之第三十旗步兵擊退。法軍右翼。亦爲普之第二隊巴甸兵所敗。於是斂兵入城。不敢再出。時於城上。以礮環擊普軍。相持至九月五日。普軍死者五百六十三人。傷者三百十有七人。喪失無可稽者三十人。統兵官員臨陳死亡者七人。受傷者十人。九月九日。普營攻具已備。士氣百倍。乃以大礮九十八尊。子母礮四十尊。環列礮壘。攻其內城。時礮藥雷轟。鉛丸雨墜。飛烟蔽空。烈燄隕地。室廬衙署。無一不燬。會堂之天文鐘。亦成灰燼焉。自九日至十一日。普軍於鎗礮如林之處。深掘地道。竟入第三重圍。攻取其墻壘。法軍不能禦。皆奔。二十一日。沿堞礮臺盡毀。磚石皆落。如齏粉。守臺者傷亡無數。於是罷攻。余

烈將軍知不能守。遂於二十七日。如約獻城。降於普營。共俘獲統兵官四百人。兵士一萬七千一百五十人。是日酉正。普國第三十四旗兵。入城據守。計自九月二十一日以來。普軍圍城益急。無不奮勇競進。肉薄仰攻。法軍設法抵禦。幾於力竭智窮。迨至二十七日。法軍死者三十人。傷者一百九十五人。普軍死傷者八百六十三人。統兵官陳亡者四十三人。此瓦得所核之數也。普軍既入城。其地耶穌教牧師立往謁見。欵接殷勤。情殊歡悅。普將瓦得安集居民。倍加撫慰。接見法國守城將軍余烈。相抱爲禮。以示敬愛之意。城中會堂。壯麗崇闕。甲於一郡。現已付諸一炬。因其適當要地。不得不燬。雖普人亦甚爲惜之。他若客館。書樓。劇場。廣墅。及名勝各所。

焚圮者大半。輪車鐵路亦已稍壞。普人卽爲修整。以便運載糈糧。由是地往哥兒城鐵路。其已燬者。遣工補築。俾與日耳曼輪車之道相接。二十八日。巴甸兵一旗。由文隸豐入城。第四旗禮吳軍。亦由勞孛列騷來。同進城中。皆以備守城之用。於外特撥第四旗寶麻蘭尼仁兵。防範法之降兵。越日由漸遞遣降兵。至日耳曼安插。瓦得將軍留兵八千人。保守境地。其餘調往法京及來昂城。用以備攻戰。普王特調哥便連士總督阿力。爲士打拉士卜總督。普王意謂是城固日耳曼之舊疆也。今失而復得。將割之隸入普國版圖云。按日耳曼國史。法之取士打拉士卜。在一千六百八十一年九月三十日。其時法國先王路易第十四在位。與日耳曼方睦。蓋非取

之於攻戰之時。乃取之於昇平之日。而以詐力得之者也。法王遣使假道於日。請曰。敝邑將用兵於他國。特以一旅之師。道經其地。左右必不有所擾也。日人許之。遂乘其無備。襲而取焉。至是已歷一百八十九年。而卒爲普所得。當日耳曼失之之時。在九月。今復得亦在九月。循環之理。有數存焉。法人於數年前。已取南士。而其後復取士打拉士卜。今二城亦前後竝亡。報復之道。昭然哉。士打拉士卜既失。法京震動。宣諭衆民。再行遴選人員。至國會議事。時城中兵士。不下五十萬。守衛綦嚴。一時未能遽攻也。普軍進逼阿連。按法國音呼阿連。爲阿厘曼。法國朝廷擬再由多亞遷往南方。車馬人役。糈糧器械。皆已預儲以待。九月二十七日。有普軍三百人。攻法之克厘汶城。城

中兵力甚單。所恃者護勇而已。居民亦願爲兵。皆出與普軍戰。法衆普寡。遂爲所敗。驅之至遠。始回。翼日。普軍復至。以大礮轟攻城堞。附近左右數村。悉爲普軍焚燒。火光所燭。幾及數十里。天爲之赤。普軍遂下此城。入而據之。在魯甕地方。有一電報。其鐵線從地中潛行。直達法國南方諸郡。傳遞信音。甚爲速便。後爲普軍所知。遣人遍地搜掘。鑿斷毀棄之。法於是軍中消息。益阻滯矣。九月二十八日。來昂城有內亂。守城官謀叛。應於普。克魯沙列將軍。亦勸民作亂。後爲法官所知。遂將謀變者擒治。旋護勇出告於官。謂倡叛者不過首領一二人而已。勿重激民變。於是居民得以無事。普人將所得於士打拉士卜城之大礮。由輪車運載。至法京城外。以備攻

擊。有自法京圍城中出者言。民人無不一心協力。與城存亡。所募兵勇。皆意氣激揚。誓死殉國。不願屈服於敵人。以故衆志成城。尙堪抵禦云。九月三十日。法軍出隊至花厘亞。攻擊普兵第六路。一時敵軍雲集。法不能支。遂退。在陳喪亡者殊多。法國廷臣之遷往多亞者。檄諭衆民。凡通國中壯丁。由二十一歲始。至四十歲。均詣所轄地方官。投隸軍籍。以備兵部調用。是日。法京出兵數隊。往攻普營。相持兩時許。卒爲普軍所擊退。乘勢逐北。遂附法之礮臺下。普軍蟻附而升。以礮環擊法軍。法軍死喪者無數。尸相枕籍。法爲之奪氣。或云。是日之戰。法軍陳亡一千二百人。法將喬成亦授命於是役焉。俘獲者三百人。普軍死者八十人。傷者約一百二十人。統兵

員弁陳亡者八人。普於近日新製鎗礮。極爲精利。命中及遠。並無虛發。法軍攻拒之時。偶入礮彈路遠界之內。已不可得。是以法軍多不能近。坐是挫北者居多。歐洲人論普法爭戰之事。言普之勝法者。究在火器之精。法雖規模相若。製造相同。而至於命中及遠。擇工選料。則遠不逮也。普於陷陳攻城。所獲法國鎗礮。皆置不用。以其器竄質薄。不能制勝也。卽有時以備數。擇用者。亦必經匠修治。然後施之行陳。普法火器優劣。以此可知。普國近日新製扛礮。形不甚巨。兩人可肩負而行。約重三十有五磅。每磅重十二兩一瞥。每瞥爲一分之一秒可發十響。靈變異常。舉之登越山嶺。殊不費力。普人藉爲攻險之用。又日耳曼人無論商農。暇則高談兵法。究察地理。幾於聚米

成山積石作陳。蓋其國中比戶抽丁。無人非兵。故好武樂戰。成爲風尚。苟有餘閒。不忘所業。此亦切於要務之一端。美國日報秉筆主人云。普國行兵。事事勝法。宜其長驅深入。而無所阻也。茲不必論其他。但以普軍人人能通法言。而法兵不能盡解普語。卽此一端。已勝之有餘矣。論者謂。觀於普法之戰。而知勝負之數。實決於運籌者之方寸焉。蓋兩國之士馬略相埒。鎗礮器械。亦不相下。而普所以卒勝之者。則以有普軍師爲之運籌焉。軍師毛奇運用之妙。存乎一心。而爲之權衡於幕府。指授於戎行。遂使勝負之判。有若霄壤。夫行軍之道。固不可無猛士。無利器。然欲專恃此以馳騁疆場。謂已極軍旅之能事。則徒資敵笑耳。普國之所以擅長者。固不能

舍士馬。而空談韜略。而實則仗韜略。以運行其士馬。韜略勝則驅策寰宇。若行所無事。區區勝負云乎哉。西國戰時。每用氣毬。以窺伺敵軍營壘虛實。法京自被圍以來。每以飛鴿氣毬。傳遞消息。往來迅速。並無所阻。故京城內外情形。尙不至於隔闕。九月中。有兩氣毬。在法京外。空際互相窺探。蓋法去而普來。升空際而適相值也。普人於氣毬中。攜有火器。遂開鎗以擊法人。中其氣毬。竟洞一隙。法人卽下。登氣毬之網。彌補罅漏。恐其氣一洩。卽有下墜之虞也。補訖仍上。以鎗還擊普人。頃之普氣毬從空下墜。法氣毬遂回法京。或云。兩氣毬互纏不脫。遂至俱隕。亦異聞也。按中國戰事。窺敵則用望樓。西國今用氣毬一法。更爲奇巧。所製氣毬。測度須高六十

丈懸升空際。俯視敵營。無不識毫明朗。更於其上。用照像之鏡。下照敵營。凡地形兵陳。均可收之於尺幅中。可謂奇巧已極。又可用電氣鐵線。一端隨氣毬上升。一端下垂至地。其人在上。以遠鏡測敵軍。有所得。卽以電線傳達於下。神速之妙。尤爲不可思議。時法國民間。喧傳布來讖語。及日耳曼詩讖。互相播語。驚以爲神。布來者。法國名城也。當一千八百有八年。其城有一童貞。預言法國後日戰爭事。在一千八百四十八年之戰。按道光二十八年。法八廢百七十年。烽火連天。干戈載道。死亡殺戮之慘。爲千古未有之奇劫。其亂必始於七月中旬。各處皆罹兵革。而京師爲尤甚。氣象愁慘。黎庶流離。其悲哀之狀。蓋有目

其王路易非立王。適於英。國中。大亂。民思前王拿破崙之武功。乃迎今法王。爲統領。是時法京兩黨互戰。路絕行人。其害尙小。至一千八

不忍見。而耳不忍聞者。斯時人無善惡。無不躬臨行陳。而亡於鋒鏑矢石之間。惟老邁者。得以幸延。殘喘耳。然殺劫之開。要無幾時。將來必有能靖之者。在布來城中。訊使三至。初爲凶耗。國所有盡喪亡。繼爲急音。其至捷如風。三爲嘉音。其人足乘水火而至。報以平安。必謳一歌。以慰衆心。此歌爲向所未聞。顧此歌也。非以稱賀法國在位之主。乃謝救世主。賜法國以昇平之福耳。踐位之王。不在於法。覓於他國。入繼法統。自此民安國泰者二十年。此布來讖語也。法人傳聞已久。無不盡知。及兵事之興。或有言及之者。皆不甚信。然所言一二端已驗矣。事過追思。咸曰。咄咄怪事。但不識終驗與否也。日耳曼詩讖者。日耳曼人所作。一千八百三十四年。有日耳

曼文士曾作一詩預言法國將敗之兆其詩云法國之機危乎危不慎其微初何為鹵莽暴厲曷足恃驟然一旦大患來維彼人兮先思而後作維彼天兮先電而後雷日邦強颺不即發猛醒提防猶可及君不見昔我先王奮武威不日崛起行撻伐邇來歐洲之人讀此詩者皆謂為法國今日而作幾視同古先知預言以與布來

識語並傳

按識緯術數之學儒者所不道如孔子閉房記之流要皆後世所託不足為據也然其間所言或有驗有不驗所以世主名臣間有信之者英明如漢光武乃雅好之一時成爲風尚以是術士之希獲榮利者至僞造妄言以干進而其書遂多迨至隋世盡焚於火於是識緯無復全書此亦一快也近代所出多假名於劉伯溫殆亦出於市井妄庸子耳然究不可謂竟無所驗也識語之興不獨行於中土即西國亦有之其見於西國古史者曰預言皆出自先知之士所口述其言立應如響於耶路撒冷之滅猶太國人之散於四方皆彰明較著以言之絕不作一摸餽影響語而其後卒驗所以西人寶視其書同於聖經賢傳顧西國不獨有之於古亦有之於今如近日布城之謠日國之詩皆

是禮記中庸篇曰國家將興必有禎祥國家將亡必有妖孽谷微之見發於幾先自有不可掩者也諸詞詩識亦法之衰氣有以召之耳第其中亦有當爲區別者布城之謠其爲凶識無疑而詩乃出自日國文士所作殆未必同於古先知預言一流味其詩意乃感激憤憤之所爲作也蓋當時普弱而法強屢受其侮日國之文人學士憤激而無所告故作是詩若以爲天道循環報復應不遠耳未必逆料有今日之事也迨經事後追思遂爲奇驗則由乎人之臆測耳法京被圍久士卒皆忿

激思戰屢次整隊出城以逼普營普人按兵不動法軍志氣愈奮九月三十日法軍出攻普軍第五第六路普軍列陳以待彼攻此拒約兩時許法人集衆以退普軍乘勢進擊時普王子亦在軍中命以巨礮隨其後連環迭放法軍退扼要地以拒守接戰未久法軍遂依次退入城中是役也法人陳亡者無數被擒約數百人普軍喪傷者亦甚多時普營攻具尙未齊集擬俟大礮運至然後向城轟擊法京外有焦利礮臺者頗鞏固普軍已附其下晝夜環攻勢甚危逼普將特遣人往說法之守臺官獻械納降不從多亞法廷諸臣諭民於十月十六日遴選人員齊至國會集議十月一日普國遣撥騎兵

四千巨礮百尊。更以步卒隨其後。往攻法之難地。城下之日耳曼兵之駐劄於腮辰者。爲法軍所擊退。日耳曼兵。後渡禮吳河。向藐捐城前進。行抵師厘士底。來昂內亂已靖。兵民安堵如常。日耳曼兵群集於多魯窩。整頓戰具。欲進攻來昂。來昂城守護勇。忠義素著。協助官軍。登陴守禦。晝夜罔懈。居民有妄動者。輒爲彈壓。十月二日。紐威厘爲普兵所焚燬。因攻之不遽下也。是日。法國老臣參亞在俄京。俄主爲設宴禮。列國使臣俱至。普法兩軍戰於以巴尼。再戰於寬丹布。又戰於阿連。時多亞城中。妄傳普軍師毛奇卒於營者。其消息初不知何自來。轉相告語。以示慶幸。十月四日。法國調壯丁護勇。出與普軍戰。兩軍始合。各奮死相角。互持數時許。法軍漸

退。普移營進逼。以巴尼城。卽於是晚攻陷之。普軍遂入城踞守。法王幽居威靈蘇。憂從中來。鬱伊善感。每聞普軍之勝。法軍之敗。輒扼腕悲憤。泣數行下。至是奉書於普王曰。自馬首之東。無日不切還轅之思。故國山河。時縈夢寐。藉大王之威。一戰而勝。俾不穀復辟於舊邦。光復故物。永備屏藩。此日夕所禱望者也。設使法人志在敵軍。戮力併命。驅之境外。則不穀之朝局終矣。以不穀之去位失國。蒙塵於外。而彼罔所顧。且舉國以拒大王。由此觀之。開釁構兵。伊誰之責。故不穀前者之舉。亦惟俯順輿情耳。今也暫息兵籌和款。法已不從。一若身可滅國可亡。而地不可割。強哉矯。猶不失法國義烈之風。雖然不穀今日雖身居局外。然深知普法兩國宜和而

不宜戰。和則俱益。戰則並傷。爭久不解。所損愈多。兩者相較。普甚於法。苟大王捐微嫌。敦夙好。結法國民心。而許之和。普法相親。其強益盛。歐洲列國。有不望風聽命也哉。不穀非法是爲。惟普是爲。惟大王其圖之。或謂法王是書。乃係僞作。蓋傳之者妄也。法王在加須兒。著一書。曰戰志。蓋追述當日普法攻戰情形也。其言法軍之敗。非由己過。而深咎廷臣。令麥馬韓回援。蔑士之非。謂當蔑士敗後。要先退師。法京堅壁清野。深溝高壘。固守根本重地。以老普師。徒事野戰。殊失策耳。普軍進取秘地威亞。法東北方之邑。曰必治。城僅彈丸。而地當衝要。普軍於九月中旬。始圍攻之。法軍守禦完密。負固不下。普將命以巨礮攻之。晝夜環攻。不絕聲。礮彈飛入境內。

者。計至二萬顆。所築攻城礮壘。損壞不堪。復用。然城猶未下也。南日耳曼邦。戈天畢兵。撤回本國。特調巴華厘亞兵。戍守邊疆。士打拉士卜。雖隸入普境。而城堞殘毀。營壘傾頽。荒索之狀。不堪寓目。十月五日。普王進取華西路大營。由花厘亞移駐於彼。按華西路城。法國名勝所也。山巒聳秀。葱鬱萬狀。有御園。廣袤數十里。中建行宮。殿宇周繚。皆極敞朗崇麗。園中風景清幽。花木紛綺。於一千七百七十年。役兵士所造。時供版築者。不下三萬人。創畫營構圖式者。名人利挪帶也。建造之資。約值金錢四十兆磅。每磅當銀四圓。有入。呂宋。其地左右無泉。汲引甚難。始議開濬魯華河導之。曲折至其所。繼以工程浩繁。不果。乃由附近之卑雅溪。引水灌注園中。水池規圓若環。四周

護以石欄。欄皆製蛙形。大小幾盈千萬。首仰足蹲。附麗其上。清泉千百道。皆從蛙口吐出。奔激噴注。殊甚可觀。其景物布置。略如法京水晶宮園中所設。噴泉非止一處。此其最大者也。每逢慶會燕賞。則以機激其水。上升噴出。高約數丈許。跳珠濺玉。歎未曾有所築行宮。尤爲巍煥。雕欄曲檻。逶迤相屬。邃室洞房。殆難數計。於法境內。素著名譽。一千七百八十九年十月六日。法國中粹有變作。亂民揭竿。讜起。有叛黨直入行宮。將劫馬利阿當業王后。遍搜不得。時王后正偕王在宮巔。觀亂民之入也。是宮閱歷興廢者。已非一次。然屢遭兵燹。卒未毀圮。此亦有數存乎其間矣。一千八百十五年。普魯士先王攻法。曾踞其地。屯兵於旁。園亭林樹。臺榭陂池。仍如

其舊。未損一椽。今亦冀如昔年焉。十月五日。普軍攻法人於聖堅田。敗之。法兵一萬二千。悉奔北焉。十月六日。普攻法之沙依仁邑。遂下其城。又攻法之奢黎士。得圍之。六日。兵民嬰城固守。城堅猝不可拔。於十月六日清晨。以大礮飛銃。攻環四周。一時火燄燭天。兵不能守。樹降旗自獻。普軍遂入其城。獲礮一百二十八尊。擒法兵二千四百人。越日。法之聖堅田邑。以食不繼。亦降於普。法京中太平會長。以兩國戰爭。生民塗炭。兵燹流離之苦。目不忍觀。耳不忍聞。殊非上天好生之心。卽揆諸仁愛者之衷懷。亦當爲之惻然。因以此意。上書於普國王后。求其講好息兵。出一言以助法國。拯之於患難。而賜之以惠和。蓋以普國正當戰勝之威。普王猶嚴父。而普

后猶慈母也。用電報達於普京。普后得書。卽諭善醫會作札報之。其意謂戰事之興。徵發調遣。日不暇給。三軍暴露於外。百姓憂惶於內。嗟茲將士。誰非人子。自其出也。老母爲之倚閭。弱妻爲之引領。痛惜之心。曷維其已。予亦日爲愁思。至於和戰大局。自有彼蒼主宰其間。天而欲邦國綏安。干戈靖息也。則人謀自能爲力耳。凡我友邦。宜相勸和。其各圖之。是日。魯華河左右。突見普軍驟至。塵埃蔽空。數約萬人。以馬車運載巨礮。隨其後。行甚迅速。聲若雷轟。時法軍大隊。聚於河旁。不下數萬人。出營布陳以待。及至。遂與戰鬪。據法人言。是役也。勝負未決。據普人言。是日。副將的勤。飛奮力進攻。首先陷陳洞。堅折銳。所向無前。遂獲大捷。法將丟勃拉所統之兵。

悉驅四散。餘軍亦退。丟勃拉已亡於陳。普軍能以寡勝衆也。如此。時法京城外。有勝克流殿。法王之行宮也。壯麗宏敞。崇飾非常。其中所貯瑰瑋珍奇之物。不可勝數。曲榭迴廊。層樓峻宇。幾於萬戶千門。不能悉記。法王常遊憩於此。前日與普發難。興師之際。卽於是宮。籌議兵事。迨普軍將逼京師。人心大震。法人恐其爲普軍所踞也。乃自行積薪焚之。一時烈燄騰空。火光燭天。舞館歌樓。悉成焦土。珠簾碧瓦。蕩作飛灰。殊爲可惜已。顧法京之民。自焚之後。亦不甚顧惜。因此行宮爲法王御蹕所常臨。其中物玩所存。手澤留貽。觸目皆是。法王兵敗。師丹。出降於普。法人銜之。刺骨。群呼法王爲師丹人。雅不欲復建是宮。故以一炬滅其跡焉。

逸史氏王韜曰。嗚呼。君臣之間。至於如此。殊非盛世所樂見之事。必

其上下皆有所謂而後出於是焉

也。樓臺亭榭壯麗非凡。其制度軒宏。規模整飭。爲諸殿冠。法王起居燕息皆於此。前年我國星使蒲宴臣奉命使法。時法王曾宴之於宮。觀舞蹈之戲。會者不下數百人。誠盛集也。法王既蒙塵東去。法后又被逼出奔。宮中虛無人。法國廷臣遂入殿中。遍加搜括。見所有各國往來文牘。及借貸契券。不可勝數。內有雕哥律將軍致富魯實將軍一書。深有異焉。觀書中日月。蓋在一千八百六十八年十月二十八日。其時富魯實方爲青宮太傅。教習韜略。故與王子契合特深。既得雕哥律書。卽以轉呈王子。書中備論普國嚴籌守禦。紛製器械。與法接壤之區。防範更密。其意大將不利於法。所懷叵測。恐戰

事之興。必在日後。勸法早爲之備。雕哥律之消息。蓋得之於婆提厘伯爵夫人云。先是夫人由普京伯靈回雕哥律。特往見之。夫人謂之曰。昔者吾愛普王之仁慈。普相之智略。普民之協和。因普法爲鄰。正相輯睦。後日斷無啓釁稱兵之舉。乃今而知其大不然也。故我之意見。已與前日不同矣。自法至普之時。與由普回法之日。所見之異。前後頓若兩人。以我觀之。普法戰事。必不遠矣。普國軍士。推選甚精。行伍甚肅。法所不逮也。若兩國從事於疆場。普必勝。法必敗。將軍其善爲國謀焉。斯我國家之福也。雕哥律因於書中申言之云。當夫人論及是事。正普相聲言偃武修文之日。其故何也。蓋普相外托慈祥。而內懷傾險。彼揚言於列國。自稱當減兵額。弛邊

防以共享。夫太平直欲使法國晏然無備。士樂恬嬉。民安耕鑿而已。則在國中整頓防兵。習練武事。冀猝乘不意。以襲攻法國。其深謀詭計。爲何如耶。夫人與雕將軍。講論此事。時不勝嘆息。且言。普國君臣實狡甚。由其外觀之。皆言與法國永敦友睦。由其內觀之。則隱挾詐譏。深懷窺伺。且笑法國之愚。信弭兵之說。墮其彀中。以迄於顛危而罔覺。且又鄙薄我君臣。譏刺我政事。藐忽我兵衛。輕蔑我戎防。謂法國不日將弱矣。行見爲西班牙之續耳。普國內部大臣士逢尼仕。笑謂夫人曰。越一載有半。法國亞魯西士省。卽爲我普國所有矣。其言悖慢如此。是以婆提厘伯爵夫人回國。不勝憂惶。恐戰鬪之興。兵燹之禍。至必不遠。此皆雕哥律將軍書中所述也。

衆人覽竟。咸爲驚異。由此觀之。普之有志於圖法也。處心積慮。已非一日。議者以爲。卽無西班牙爭立王子一事。將來亦必借端啓釁。惜乎法之驕亢鹵莽。竟至墮於其術中而不悟。然則法之所以蹶。普之所以興者。無他在。在有備與無備而已矣。然法固未嘗無人也。誠能如雕哥律之先事戒慎。早爲之所。使敵無間以蹈我。則普雖狡焉思逞。亦安得無端發難哉。獨怪王子旣得是書。仍置不問。豈以普爲不足慮耶。抑怠於振頓耶。雖廢興自有天命。而人謀之不臧。未可遽以天命而自諉也。時法京已爲普軍環築長圍。以困之。外溝而內壘。足以捍敵。蓋普用此計。反客而爲主。轉勞而爲逸。眞爲深於兵法者也。當普軍之初築壘也。逆料法人必以礮擊。因以前

數里許。以稿束作人形。蒙以衣冠。參差屹立其間。普軍卽於後稍遠半里許。晝夜開掘。縷鋤銛利。用力不勞。數日間長圍已就。法雖擊以大礮。皆中稿人。而不能及普軍也。迨濠壘皆成。法知其詐。亦無如何矣。普之計亦巧矣哉。法京守禦之具。久已備集。街道中石。多已除去。通衢曲巷。悉皆以沙鋪地。房舍中牕牖。亦盡毀除。胥塗以沙。蓋以防炸彈之入也。炸彈遇沙。則雖致迸裂。亦鮮延燒之虞。其防禦亦可謂密矣。按巴黎斯京城。爲歐洲第一繁華之區。一時景象落寞至此。可爲浩嘆。盛衰轉轂。豈有常哉。法京商部出示諭民。凡京內所有米穀。盡售於官。由官爲酌量頒給。所定價值。悉以九月初旬爲例。柴薪石炭亦視此。因恐商人妄增物價。一時騰貴。貧者

得食艱難。必致生亂。又頒一示。凡同一街市。限於每七日中。殺馬八百匹。工部出示。所有鮮魚。亦由官辦官售。因法京內有兩河。一曰仙河。一曰蠻河。發源頗遠。環注城中。水族殊衆。得數鮮食也。京中糈糧。不足以敷數月。食物以此漸昂。鬻肉鋪前。環集而立者。有數百人。以購得者爲大幸。購肉者必預先記名取籌。始能得之。然不得多購。富貴家始得肉食。其餘則以得度一日。如慶再生云。計法京人數。不下一百數十萬。平時每日食料。約羊一萬二千頭。牛六千頭。茲當窘急之時。每日宰牛五百頭。羊四千頭。較諸平時。已減去五六倍矣。其城中之繁富。蓋可知也。普圍法京。旣於四周築軍壘。建礮臺。而復以騎兵。晝夜巡邏。城外輪車鐵路。俱已爲普軍所毀。

斷。凡可以通出入之處。以重兵堵截。一切資糧薪芻。皆無從接濟。以是城中愈困。卽消息亦幾致不通。始用氣毬以傳遞信音。顧普營亦製氣毬無數。以防範之。往往有遇之空中。從空鬪擊。於是法人乃以鴿帶書矣。傳書之法。能以尺幅之紙。捲成粒米形。納於鴿毛管中。繫之鴿鈴。一幅紙可寫書一萬五千封。其字密於毫髮。以顯微鏡書之。細不可辨。見者幾以爲鬼工云。自圍城以來。所有歐洲列國。郵致其國駐法使臣文移。遞至法京者。必啓封而後得入。列國使臣。已於九月中。聯名致書普相。求於七日中。限以一日。專人攜出寄遞各國。旋普相覆書於法國總理衙門云。凡攜遞欽使文移之人。苟係啓封之函。許其竟過。不然則否。書中勿得述及軍旅事。

十月六日。列國使臣再行致書普相曰。我儕出使於外。駐筭人之國都。原冀與朝廷消息時通耳。况書中所言者。皆公事無私語。卽及兵交始末。亦必援照萬國公法。戰時條例而行。斷不有所逾格也。如必啓封可遞。則此事似難準行。我儕不能如約奉守也。尙乞圖之。時普營攻具已齊。所有巨礮長銃。均已位置於礮壘。環向法京。顧京外礮臺林立。欲攻法京。必自先攻礮臺始。普王初意。雅不欲以炸彈飛丸攻毀其城。但設長圍以困之。欲待其自斃。蓋俟其糧絕援窮。至於萬分危蹙。則必舉城出降。於民人既無所傷。而於房屋亦無所損。又於己之兵士。可不勞憊。而鄰國又群稱其惠心。頌其仁德。此所謂一舉而四善備焉者也。今聞法京之人。雖困不降。故

定議擬將大礮攻城。十月七日。普法兩軍戰於蔑士北方。營壘中鎗礮之聲。轟如震雷。竟日不絕。蓋普至是攻之者已三矣。此役也。號爲根麥之戰。根麥者普郡王麾下名將也。猛勇異常。居普營前列。所統者第九第十路普軍也。是日日加未。巴彥親統部兵。自城出直前奮擊。兩軍相持。鉛丸如雨。羽林軍居中權。其戰尤力。法兵方擬再進。忽普之第三路軍。從旁夾攻。遂不能支。至暮始各罷兵。互有死傷。普軍陳亡者第十路五百人。第三路一百三十人。法軍亡者二千五百人。同日。普軍以巨礮圍攻法之紐布厘薩城。循環迭擊。自辰至午不絕聲。火龍萬道。直射城中。志在必下。城中兵民登陴守禦甚力。得不遽陷。然南北東三方皆火。廬舍倉廩盡在烈燄中。

至夜撲滅。猶未盡熄。明日再攻。盡施子母礮彈。益復猛烈。因其嬰城固守。不肯納降也。於是城中四周皆火。男婦號哭之聲鼎沸。城遂破。普軍入據。但見一片瓦礫而已。亦慘矣哉。有一阿非利加人。從法之瓦須兒城外。至紐布里薩。述其地附近鄉村。景象荒索。所有物產。盡遭人馬蹂躪。不獨明年有飢饉之憂。卽此時果實無以。秋成不穫。枵腹嗷嗷。無所得食。亦惟有待斃而已。其地居民。一言及普軍。無不同聲切齒。願出一死與之從事。蓋以求生不得。故甯與之同盡耳。加厘波地者。以大利之名將也。韜略深沉。謀謨宏遠。因見法之屢敗於普也。常爲扼腕太息。曰。法奈何孱弱至是。及聞人言普軍師之用兵如神。普王子郡王之將略不世出。則又慷慨

歛歔。攘臂以起。自惜置身局外。無尺寸之柄。爲法排難解粉。息鄰氛。而弛兵禍。以與普將一角。其優劣短長。師丹之役。知法之真不可爲。遂請於法。願統兵相助。其子隨之。加君名譽夙著。法人甚仰慕之。今聞其來。無不額手相慶。曰。敬如命。吾儕固望子久矣。遂令統督和士克河上之兵。前往多亞城爲扼守計。居民知其至也。咸相歡躍。士氣亦爲之一壯。於是加君遂以客將自成一軍。是日清晨。法國內部大臣監必得。由法京乘氣毬逸出。行至亞緬士。遂下少息。居民迎迓甚恭。來諮國事者甚衆。監君言。現有新例。公舉人員日期。再行展限。法國於京師。增設製造軍局。廣備器械。日不暇給。每至夜間。爐火燭天。城中婦女。無不躬親操作。一日可鑄鉛彈一百

萬粒。有一法人名阿甲思伯訂。著名工匠也。心敏慧多巧思。能以舊鎗改製新鎗。師撥新鎗。師撥法國新式鎗名。造鎗人名。師撥故名。師撥鎗。機括

轉動。靈變異常。於是遠近礮局。多延其製造。十月七日。八日。薄暮。普國第十六旗哈薩兵。屯於哀布里思村。附近其地。居民突出攻擊。因未及備。頗有殺傷。普軍忿甚。盡焚其村鄉。付之焦土。以示報復。十月八日。普王子建營於華西路。卽於法王行宮。行策勳大禮。凡將士之著有勞績者。皆賚予銀牌。用錄其功。以示寵異。是日。普王鑾輿蒞至。大啓噴泉。與群臣縱觀爲樂。置讌賀功。至夕始散。九日。法人以大隊勁旅。突從魯華河出擊。普軍。普軍以精騎橫截之。使不得出。相持久之。法軍始退。十月十日。普國丹將軍敗法之魯華兵於阿甸尼。是日。有普

魯士日耳曼大兵六隊。往攻沙梨士鄉。步騎並進。兵勢甚盛。是鄉密邇都羅樹城。法民見普兵驟至。無不踴躍出戰。築壘掘濠。以當大道。故普軍不得進。相持至三時許。普軍始退。其時普之礮兵復至。乃發大礮攻其鄉。炸彈橫飛。半成焦土。民之流離顛踣者。遍於道左。附近村落。如薩尼里尼修甲不拉沙三鄉。亦遭一炬。一時烈燄燭天。廬舍萬椽。盡爲瓦礫。普軍駐於鴨利士。居民忽乘黑夜襲攻其營。日耳曼之蝦沙兵。不及備。受創甚焉。普人遂縱火。盡焚其鄉。普營將士。移文往來。皆料法京必至飢困。因法京外周環有數十里。土地荒蕪。屋廬空圯。其留者。皆赤貧之家而已。加厘波地將軍。統領法國壯丁。往屯於阿薩尼。其地有日耳曼兵據守。遂與之戰。普

營騎卒風馳。礮隊林立。相持至暮。法兵不能當。退駐礮臺。極力守衛。而急遞電報。求援於阿連城將。請撥步兵四隊。礮旅一旗。馳救之。久之。援兵不至。翼日復戰。敗北。乃退走阿連。隊伍參差。極無方略。所餘疲卒一千。巨礮無數。皆不及顧。委之而去。時法人援阿連之軍。四集於城下。普軍圍泰安威兒。用礮環攻。鉛彈所及。甚遠。直隕於科士北城外。十月十一日。法人屯兵於魯華河左。以拒普軍。俄而普軍大隊忽集。遂相決戰。自晨達午。法不能支。盡爲普軍逐之。過河。陳擒法軍一千人。餘衆入阿連城中。堅守不出。普軍於是徑濟而南。環攻阿連城。晝夜不息。遂入之。生擒法兵一千餘人。時攻者爲普之第十一路巴華里亞兵。第二十二隊馬步兵。統率大員丹

將軍也。才略冠時。軍中號爲飛將。其攻城也。皆以連環巨礮。火龍百道。駕空橫飛。霆擊雷轟。山鳴谷應。炸彈之重二十四磅。城之四周雉堞。摧墮如粉。城中房舍。無不延燒。一時火燄蔽天。號哭之聲。載於道路。於是教中牧師偕地方官。手持降旗而出。親詣普營。求其罷攻。普人許之。其城遂屬於普。來昂郡城。法之名城也。最號富強。稱爲雄鎮。聞阿連已失。紛紛備守禦之具。已在城外高處。建立礮臺。爲其四周保衛。時開坑塹。築土壘。工作者約三千人。守城官定製鎗礮二十五萬。鉛彈無算。工匠竟夕鑄造。爐火之光。上燭霄漢。先以十五萬鎗礮。安置鄰郡。以爲防捍資用。備不虞。法之聖低薩邑。爲普軍所攻陷。設兵據守。下令徵民間銀五十萬佛狼。否則將縱

兵大索。拘鄉老五人。寘獄。責其速辦。限期次日午後納銀。逾期不至。所有屋宇。悉付一炬。繼而法人無以應命。普軍怒。乃馳入鄉村。縱行侵掠。各鄉耆老。願輸銀十五萬佛狼。普人謂是寥寥者。何足受也。竟置不收。但四出劫奪。狼若狼虎。毀屋傾囊。無所不至。村中有一屨工。奮然持鎗。出擊殺普軍。普軍還擊之。立殪。普統兵官出示。曉諭法國魯華河左右鄉村云。汝衆尙慎旃哉。勿干犯我師旅。勿瀆冒我將士。殺普人一。則抵以法人五。小有侵凌。卽爲大譴。勿謂言之不預也。時城中設有日報局。普人諭令停止。杜其洩軍情也。十月十二日。法人屯兵於嘉丁里。普人調師往攻之。互相持拒。卒爲普軍所勝。遂據其地。附近有聖堅的鄉者。其地頗當衝要。特四無

障蔽無險可守。無隘可扼。而法有守兵。屯聚於此。十月九日。普軍驟至。地方官激勵民壯。踴躍出戰。翼助官軍。攻拒普軍。兩軍殊各死戰。相持至暮。普軍始退。然地方官躬當矢石。已折一足矣。當戰事之興。民壯苦鎗械不足。冶局工匠。慨然出告於衆。曰。誰非衛國家保鄉土。以勞於王事哉。肆中所有。任爾取攜。於是其事乃集。此亦足以見法人之急公好義者多矣。以大利王既得羅馬城。詢於衆庶。謂此城與以大利國分合於義若何。其言宜合者。四十萬。言不宜併者。僅五十人而已。法國戰艦駛回尼卑海口。法將刺末禡職罷歸。以巴刺顛將軍代之。法京食用日匱。美國運載各物出口。逕駛至法境。以供給之。俄國王后以醫士所用器物饋於普國。以供瓦

添勃軍局醫館之需用。資治理。咸頌俄后之仁心。無間於彼我也。十月七日。普軍大獲勝捷。攻據以巴尼。時別有普軍一旗。屯駐於寬丹布路林木間。法軍襲擊之。退走。旋普軍由以巴尼移屯依潭。此外更調普軍一千五百人。據守藍褒。比利時於交境處。整頓防兵。嚴飭守備。因美師亞城爲普所圍。困守未下。恐城破之日。普襲法軍。侵入其境也。時各省團兵之令下。由多亞新都。頒行各處。所有民壯。無不踴躍戎行。咸願同心戮力。以報國家。惟是步伐隊伍。皆未訓練。必先當設法整齊。以肅軍律。而後可用。普人揚言。欲取那文地。法地方官聞之。諭民先爲之備。盡移牧場牲畜於內地。法京中民心甯謐。軍士謹嚴。守具齊固。兵備整肅。閭閻所儲食物。亦尙充

阜。法官克厘士卑辰尼。致書公舉人員云。指日間有大軍兩隊。援濟法京。普軍用飛礮攻紐布禮薩。炸彈所及。輒遭焚燬。法京之兵。有從城中出援者。爲日耳曼伏兵所截。不得逕前。普法之軍戰於窩治士省。日耳曼兵進攻難得烈。普軍不日擬再舉。圖下聖堅田。法國各省壯丁。皆隸兵籍。演習隊伍。以備入援。普人因遍檄法民云。無論何省。有出一兵以助戰者。卽行勒捐一百萬佛狼。以充軍餉。所以示罰也。法兵據卑棣威亞。日耳曼前列之兵。已入土魯士境。普軍圍攻聖堅田。法軍拒之甚力。轉戰而前。無不以一當十。普兵不能勝。遂退。普法兩軍戰於廉尼。時法兵雲集。而日之卑電兵。精銳無前。善於以少擊衆。大敗法軍。陳擒統兵官六十員。兵士六百。

來昂卑辰干兩郡。聞之震動。守備益嚴。法國內部大臣。監必得統理全權。籌拒敵軍。檄諭遠近各郡云。邇來京內兵民。咸能激發忠義。以翌護神京。自可無虞於敵衆。惟汝等毋畏強。毋怯寡。各宜自奮。合億兆之力。爲力。結舉國之心。爲心。一戰驅之用報國家。勉之無忽。普軍取阿連郡城。翌日。普國丹將軍徵阿郡法官助餉。索佛狼一百萬。刻期兩日。遲則有誅。後括諸民間。得六十萬。納於普將。其事遂已。因法官都班烈爲之請於普王。故得少減也。普軍又索牲畜六百頭。呂宋烟三十萬枝。所有城中馬匹。概交普軍乘騎。毋得私藏。或謂普之行軍。紀律嚴肅。於民間無犯秋毫。而破城之後。猶且苛索橫征。如此。則他國可知矣。嗚呼。軍旅戰陳之間。誅求悉索。豈

得免哉。此較之劫奪縱掠固已賢於霄壤矣。十月十二日。有一氣毬。自法京中出。乘風而行。離地甚高。行至申刻。落於法之都異邑。述及法京中兵民一心。可以無虞。其始出也。道經普營。普軍見之。燃鎗向空轟擊。鉛丸之高。約可至一千五百蔑打。一蔑打計英尺三十九寸然毬之行。高約在二千蔑打之上。故遠不能及也。普法兩軍各駐於魯現。時有戰爭。普軍向亞棉。邁征爲進攻計。法將褒巴奇請於普王。許由蔑士往謁法后。及其旋也。卽往多亞城統兵。不日卽授要職。普軍已環圍法京。惟未附於城下。其近城圍兵。旋自撤去。法軍乃出。而毀平其壘。普人之意。先於法京外。因扼北方諸礮臺。蓋以礮臺爲城之障蔽。而北方尤爲要所。故欲攻城。必先自攻礮臺始。欲攻全城。

之礮臺。必先自一隅始。初普軍之撤也。法廷諸臣皆喜以爲。係法兵擊退之力。不知普軍志在固圍。不在嚴攻。惟敵兵出則拒擊。而不復深進。以多傷士卒。俟巨礮轟城之日。然後一舉而下之耳。普軍已據布列地兒。屯營於機蘇。整飭守備。圖攻魯現。旋與法軍戰敗之。陳亡者無數。遂入其境。普法戰於門梅地。所有留駐於士顛尼之普兵。爲法人所擒。日耳曼兵攻據依邊那。統兵大員普將窩電也。所統第十四路兵。精悍善戰。有別將統兵五千。進圍烏卑扶里薩。普軍又往攻腮辰窩頓。選礮隊之銳猛者。扼守其隘。期以必下。十月十六日。以大利將加厘波地。馳抵卑山干。兵民夾道迎迓者殊衆。是日。普法兩軍戰於腮辰。法軍敗績。陳擒法之統兵員弁九十

九人。法兵四千六百三十三人。此役也。相持四日。法兵皆係未經練習者。故至甚敗。旋法之守土官獻城納降。得大礮一百三十二尊。自此普兵之往法京者。輪車鐵路。又得第二道矣。法舊布厘薩邑。離孚禮畢。僅四十有五里。邑中居民三千人。男勤耕。女勤織。皆自食其力。平時樂業安居。頗有熙皞之風。左右皆岡嶺。多林木。濃陰掩覆。可消炎暑。每至盛夏。日長。土人群聚於林下。茗酒流連。藉以消遣。自樂。禮吳河正與相對。其處建有小礮臺。設兵三百以資戍守。在新布厘薩邑。亦築礮臺。但建置完固。形勢雄壯。幾大數倍。當法將尼耳在時。大加修葺。故稱巖邑焉。舊布厘薩守邑兵士計五千人。普軍既渡禮吳河。遂遣別將圍其城。十月十六日。法軍二千人。

乘大霧迷漫之際。出攻普軍。略施鎗礮。遽退。蓋欲審普軍虛實。而并探其兵數多寡。時普之圍城者。為巴定兵。甚驍勇敢戰。與是城毘連者。亦有些厘士得城。相距不遠。亦僅數十里。時境中大麥正熟。法地多寒。麥必至秋時始熟也。土人粉集

出刈。普軍過亦不犯之。然土人狡甚。身懷小鎗。俟普軍有離隊孤行者。潛擊殺之。十月十八日。法將機利地厘欲往西班牙借兵。不果。普軍進攻法京外要隘。未能遽克。以法人奮力苦拒也。法之薩雕但城。久為普軍所圍。法人嬰城堅守。猝未能下。十月十八日。法兵整隊出城。奮力與普軍角戰。攻拒相持。約歷五時許。卒為普軍所敗。乘勢逐北。法兵退走。普人遂入其城。設兵據守。法總理內部大臣。往和遮士觀軍。法將褒巴奇統領北軍。法

國援兵紛集於來亞河。在布尖時有輪車大橋。普軍以其通南北之往來也。立毀去之。時各路普兵已悉渡來亞河而南矣。十月十九日。普軍攻踞捫地得城。搜括民間佛狼五萬。曰。助軍餉也。旋攻威蘇兒。入而據之。其地距卑辰干八十里許。法國新都廷臣即多亞移文歐洲各國。志在求和。所議之款。其略有三。一。酬餉八十兆磅。二。亞魯西士郡羅連郡。為兩不偏屬之地。俟十年後。眾民公舉。任歸何國。以為定奪。三。立約當在法京。普法戰爭日久。法人兵燹流離。死亡相繼。普不任其咎也。然法志在於和。惟願永敦輯睦耳。十月二十一日。有法軍十二隊。巨礮四十尊。由法京外花拉連礮臺。出攻普軍。其鋒銳甚。普軍結方陣以禦之。轉戰兩時許。普勇法怯。法軍

遂敗走。普人於十月七日。取聖堅田。蓋法民以食盡而降。非心服也。十月二十一日。聖堅田城中人。聯絡附城近鄉居民。突出攻擊普軍。頗有死傷者。旋有普之麥蓮畢兵五千人來援。迭用大礮。連環轟擊。城堞毀壞過半。辰刻。普軍遂入其城。下令徵民間捐助餉銀。須納佛狼二百萬。無則付諸一炬。時民間皆室如懸磬。計無所出。乃貸諸銀肆納之。普將致辭曰。不腆敝賦。聊以犒師。今而後共享昇平。無勞悉索。是日薄暮。普人拔兵啓行。移營他所。法以重兵鎮守亞棉士城。防普人之潛師輕襲也。十月二十二日。普將窩得於依邊那邑。出攻法軍。敗之。逐法國東方兵勇。遁入卑辰干。十月二十四日。有婦穉數百人。自法京中逸出。求於普軍。曰。顧示生路。普軍

揮之使返。復以鎗擬之曰。不行當卽擊殺。婦穉皆涕泣。言曰。甯出而死。不願入而生也。此苦烏能受哉。普軍乃縱之去。至夕法京外刺威力礮臺。轟擊不絕聲。法國邊境些利士德礮臺。爲普所攻。勢甚危迫。不得已納降於普。俘法兵二千四百人。大礮一百二十尊。自普法構兵後。西班牙君位久虛。至是乃舉亞迷得士王子。入繼大統。普俄奧三國俱許之。按王子乃以大利國王第二子也。十月二十六日。卽位於國中。臣民皆稱賀。日耳曼兵離威蘇魯邑。向法國西境邁征。是日於亞棉魯現布來標賤尼左右。小有攻戰。普法交兵以來。大小數十戰。無不勢崩雷電。色變風雲。血溢川原。尸填山谷。然自九月初旬以後。則無大舉以決勝負者。何也。蓋以法之額兵。

原不過四十餘萬耳。其餘皆國中壯丁。未經習練者也。今計法國之兵。一俘於師丹。計十有五萬。一困於蔑士。不下二十餘萬。而法通國之師。盡於是矣。普兵進搗法京。長驅直入。並無所阻。故普兵得以攻城掠野。無所顧忌。必俟魯華河上各郡徵募之兵勇既集。然後能拒敵也。自師丹戰後。至十月中旬。普國所有俘獲兵士軍械之數。略詳如下。在魯晏城。獲大礮二十三尊。俘壯丁二千人。於土魯城。俘官弁一百九員。兵二千二百四十人。獲馬一百二十四匹。大帥旗一桿。巨礮一百九十七尊。鎗三千桿。刀三千柄。戰甲五百副。於士打拉士卜城。俘官弁四百五十員。兵士一萬五千人。大礮一千二百尊。馬一千八百四十三匹。些厘士得城。俘兵二千四百人。大

礮一百二十尊。有郵報文士。統核法國兵敗以來。所有喪失器械賞糧。不可勝數。今爲約略計之如左。自一千八百六十八年。至一千八百七十年。兩年間。鑄造軍械約四十兆磅。攻毀礮臺。後當修整者。約六十兆磅。所有在陳在城。失去鎗礮藥彈。輜重軍裝。約六十兆磅。焚燬物產屋宇。約八十兆磅。機房工織器皿。約四十兆磅。田園植物。一切雜項。約八十兆磅。迨後議和賠款。約一百兆磅。總計之。不下四百六十兆磅。法雖自稱饒富。自此一役。亦必匱矣。法將巴彥遣人。由蔑士出往謁普郡王。旋由蔑士往華西路。普王大營。普軍之圍來昂者。又欲往攻豪爹威厘。時來昂城中。餉糈僅足支兩月。普人調集新軍。進圍法京。益壘增師。統計將士三十有五萬。有

一氣毬。從法京圍城中出。遞至總理外部大臣發孚檄諭云。今者法京當危急存亡之際。民心安定。誓守不貳。目前戰鬪之禍。甘受而不辭。如普人脅以威力。甯死而已。法之那文地。籌備守具。以拒敵軍。普國麥連畢兵勇五萬人。進駐聖堅田。勒令其地民人捐納佛狼二百萬。以充軍實。普軍揚言將攻波遮士。法軍之守沙威兒者。出與普軍戰。不勝。美思亞有法軍五千。嬰城固守。普軍圍之。已附其城下。不日將以巨礮轟攻。普人以大兵圍必治。其數四萬八千。皆驍騎也。攻城礮隊。悉係精銳。普軍離亞棉城。僅十里許。法京之兵。由華刺連岡。出攻普營。區軍十有二隊。列礮四十尊。與普軍相持兩時許。普軍縱橫截擊。法不能支。遂退。俘兵百人。獲礮二尊。普軍

二萬圍攻薩得城甚急。法守城將軍知不能守，循例納降。法國新都廷臣皆望和議之成，以與普國息兵。其居間勸和者英國也。先立暫息兵之約，俾法人得以集赴議事。其助英調停者，壤地里以大利也。俄亦願為普法兩國排解。然普國之意必欲割地然後許和。故普軍於羅連郡左右陸續勒民助餉，未有退意。法與英京國帑貸金錢一千萬磅以濟軍需。英人以議和諸約款由電線達於普京。法國老臣爹亞承歐洲諸國命為議和使。既於法京會議後遂出使於普營。英人擬於和議成時請法后復辟為立約主。法后固辭遂止。法將褒巴奇總統北軍區為北中東西四大營。北營屯於里厘，西營屯於里文，皆歸褒巴奇節制。中營屯於包治，褒厘士將軍

統之東營屯於卑辰干。監布厘將軍統之。四周分峙。互為聲援。褒巴奇設法鎮守里厘。備極嚴密。

普法戰紀卷五

校合山田榮造

普法戰紀卷六

南海 張宗良 芝軒 口譯
吳郡 王 韜 紫詮 輯撰

普自師丹大捷。長驅深入。遂圍法京。下邑攻城。所向莫禦。列郡弱藩。籬之固。衆民殞鋒鏑之災。法至此已無可望矣。而其尤係於存亡之大局。勝負之轉機者。則在蔑士之一降。蔑士一名牟士。日耳曼之言也。其意猶中國之言處女。蓋其地境險臺多。足資守衛。故取義於兵法。守如處女之義。因以名其地焉。屬羅來。內部所分。法國東北隅邊徼也。東界日耳曼。北界比利時。土壤毗連。犬牙交錯。扼險防守。視爲要地。昔日法國固取之於普魯。

士者。溯自三百一十八年前。日耳曼國中。天主耶穌兩教起相角。各結黨援。互相仇殺。塞慎尼邦摩列士公爵。固新教領袖也。求援於法國。請法王興師助已。翦滅舊教。黜教皇查兒魯士第五之位。竄之遠方。許事平割。茂士一郡以酬勞。於是地遂入於法。然茂士人民。雖敬奉天主舊教。而頗不樂法政。屢籲羅馬教皇。潛師襲取。而已願爲內應。顧其時法方盛強。以重兵鎮守其地。教王雖欲之。而無如何。民以無外援。亦未敢妄動。後閱百餘年。法王路易第十四在位。國富兵精。方圖遠略。普魯士近與之隣。時爲所制。自正疆界議起。普法會於威士輝厘亞。申畫郊圻。定盟立約。遂以茂士饋於法王。嗣後永隸法國版圖。事載日耳曼國史。法既得此地。增築加

修防禦益嚴。用以拒日耳曼。倚爲屏蔽。普法軍興。法王屯駐御營於此。及退走師丹巴彥。以二十萬衆坐困其地。普郡王以重兵據其外環之三匝。巴彥三戰三北。不得出雷池一步。三戰者。一戰於彭邑。再戰於摩刺多。時法軍由十六萬增至二十萬。普軍僅四萬五千。幾於以一敵四。普軍陳亡者一萬七千人。統兵官弁六百員。三戰於革里富律。皆普軍勝而法敗。十月十九日。西國日報主筆之士。偶遊茂士境內。攀涉高岡。一望空闊。普法戰場卽在其下。偕行者爲談。一昨兩軍戰事情形。歷歷如繪。先是連朝重霧。天色陰晦。或傳巴彥將乘機突圍出者。探普兵於北境。守禦未嚴。意欲向魯星勃而遁。因是檄諭各營將士。慎加防範。毋得疎懈。繼巴彥知普軍

有備卒不敢出。再躋一阜。見結營行列。疎密有法。步騎各軍。無不好整以暇。俄見礮兵於蔑士外。舉礮百一響。爲普王子生日賀。法軍聞之以爲攻之也。立由聖堅田礮臺燃礮還擊。嗣聞普軍無聲。始止。由此再入。則蹊徑益險。林木叢雜。劣能容足。兼慮斜陽迫暮。無可栖宿。遂轉趨他途。行未幾。抵一瞭樓。岩堯矗立。普軍建以窺敵者也。其地名聖布厘士。樓踞一小山之巔。距干尼處約三里許。是樓正對法人聖堅田礮臺。小山左爲布厘劃礮臺。俯視其下。招依川滌洄若帶。摩思厘河迴環曲抱。皆在山麓。由是處望蔑士城。雉堞參差。歷歷可數。城中塵市街衢。縱橫交錯。無不悉辨。凡有法軍動靜。一覽了然。飛鳥伏鼠。亦無能偷渡。其嚴密如此。在麥西里霍。普

人亦築瞭樓。以臨法營。然遠不及此之明審也。樓以巨木建成。鞏固屹峙。樓中有一絕大遠鏡。可以矚遠窺察。細微。樓四周皆設電線環繞之。通達遠近各處。一遇有警。立卽遍遞諸營。布陳備敵。是以普軍易於速集待法兵之出。已如網羅之四布。普軍所以能困遏法人於蔑士者。用此術也。主筆士因出所攜遠鏡。以窺蔑士。見蔑士境內。蛙治村。馬來村。革蘭村。皆法營也。普營則環其外。以視法之所屯。正如雞母之翼。雛普營在忌立尼村。搬尼村。乃成環圍焉。以上皆主筆之士所述。觀此則法營之情形。眞如繪之於紙上。普軍又導主筆之士。往觀。八月十有八日。普王登梯觀戰之處。是事史臣已纂之於普王實錄。十月下旬。天氣驟寒。重陰凍沍。每晨大霧。

迷漫對面不得見。法人潛軍屢出襲攻普營。二十五日。連朝霧雨。陰霾如晦。法軍整頓行裝。思乘間逸出。普人聞之。檄諭各營戒嚴。旋法軍知其有備也。不果。忽飢民數千。猝從城中出。男婦老弱。無不鳩形鵠面。狼狽萬狀。前詣普營。求出。普軍士以鎗擬之。阻之使不得前。始退。一婦縛白巾於竿。颺而前。逕近普營。顧而無繼。亦退。九月至十月。相持六十日。城中食漸盡。諸物踊貴。白糖一磅。值佛狼銀錢三十枚。鹽一斤。價半之。豕蹄一肘。值佛狼三百枚。薯一顆。值仙甜士銅錢五十四枚。蒜一頭。值仙甜士六十枚。偶於革里富律村。獵得野豕一。人爭購之。獲值殊饒。計得佛狼七百四十八枚。醫士治理病卒。藥餌盡竭。割截手足者。無麻藥。治傷者。無止痛藥。被圍

以來。因病殞命者三萬五千人。皆因無藥調治。不盡由陳傷也。芻粟既絕。軍中殺馬以代糧。久之。並馬肉亦不可得。於是。有枕籍而死於道者。惟病卒則尚得食炙馬肉。然皆淡炙而無鹽。或傳洵周連地出鹽泉。及往驗之。則謬。蓋軍中故爲此言。以壯兵心。蔑士城守將軍哥芬納白於巴彥曰。外有圍兵。內無軍實。今營中僅存三日之糧耳。盡此豈相與枵腹絕吭而死乎。事急矣。宜早爲計。於是軍士潛有出降於普者。巴彥亦置不問。以糞兵少食減。或可得以久守也。越三日。哥芬納復以糧匱告。巴彥乃屬其麾下。集議曰。今軍中僅有八日之糧。爾卽使減食忍饑。亦不過支持十日間而已。故必當早爲設法。我將善爲汝衆圖之。堅拉白因與所部將士籌商。第

六軍已願納款。但欲取鎗礮攜旗纛。退往法國南方。設立誓言。不再臨陳以攻普軍。設或不許。則惟有冒死突圍而已。第六軍統兵員弁中有卑臣將軍者。獻策於堅拉白曰。欲出蔑士重圍。非取道於摩思厘河不可。其地左右岡阜參差。樹林叢茂。藉此爲蔽。即使摩思厘右河屯守之普軍。知我兵之出。以鎗礮截擊。一時亦不能遽及。况其地駐軍甚少。併力擊走之。亦甚易耳。然後直趨泰安威路。不過一日可至。既抵是城。而後別圖再舉。不亦善乎。旋以是謀告巴彥。巴彥不從。逾數日。各軍士聞前鋒巴耶已往華西路普營立約。十有八日。堅拉白乃告卑臣曰。倘普人不允納。是約則將如何。卑臣曰。惟有依我策而行耳。是日亭午。堅拉白再集衆而告之曰。今

普王不知有法京護國廷臣。只知有法后耳。故遣巴耶往見法后。凡汝統兵大員。以逮偏裨武士。當仍推戴法后。遵普意旨。以期出此逆境。繼又示以普軍進攻蔑士之圖。因謂之曰。彼設計嚴密如此。豈我軍所能拒守哉。故惟有納降一著。方保萬全耳。十月二十四日酉刻。堅拉白諭衆曰。法后雅不欲重蒞朝綱。主持此議。今惟有遣山嘉納將軍與普郡王立約耳。後二日。堅拉白再集將士。諭之曰。今約已立。凡汝諸將。皆當循降例獻俘。卑臣將軍聞之。盛怒而作鬚張髮指曰。噫。吾曹豈甘爲降將軍哉。請卽親統萬騎。馳入普郡王大營。搴旗奪礮。方足以張吾軍威耳。堅拉白曰。此恐無能爲也。苟力足以拒敵守境。何遽出此。請依大帥所立約款行事耳。初堅

普法戰紀卷六
拉白貽書諸將。擬焚帥纛。然當出獻之時。悉交於普營。所有堅拉白告諭將士之語。皆非實事。迨後始明其僞。蓋當時惟欲令其勿拒普軍。而和議不至梗沮耳。蔑士諸軍。志在一戰。而主和者。惟巴彥利布父堅拉白三帥而已。堅拉白最得軍心。故令其反覆開諭。先以虛詞謬說。淆蔽其衷。然後直告之於臨時。否則軍心一搖。變亂必生。則潰散而不可收拾矣。十二月二十七日。降議既決。巴彥乃遣山嘉納將軍。持白幟往普營謁見。郡王特命第二路軍騎將士的哥羅。第一路軍大將伯爵瓦丁士厘平。與之籌論降事。經議兩時許。始定。卽以電報達於普王。普王許之。所議降款三事。一城中所有鎗礮藥彈。盡交普營。內外礮臺。悉爲普軍所守。二法國統兵官

弁。聽其自便。惟不得再履行陳。爲普軍敵。三所有納降軍士。循俘獲例。解至日耳曼安置。旋卽將所議約。上達普王。以俟意旨。翼日。普王命下。曰。謹如約。蔑士之降。既有成說。普人乃於沙北勒。採備食物。以應法兵降時所需。後續議七事。更爲周至。一巴彥所統之兵。悉數獻俘。二凡蔑士所有礮臺軍實。及一切官物。悉歸普軍。於十月二十九日。亭午。聖堅田礮臺布立卑威兒礮臺。及其餘礮臺。都交普軍據守。是晨巳正。普之司礮營匠兵士。先入礮臺。防護火藥局。三凡鎗礮器械。旗幟馬匹。輜重糈糧。盡置礮臺。以便交與普官。所有納降之法軍。必先去軍械。或每旗每隊。任由普人解往何處。統兵官員。任其或歸蔑士。或居營壘。但當謹守誓言。必得普官命。方

可離之他適。四所有統兵官員。上至將帥協副。下至偏裨佐貳。簽名誓章之後者。不在戰俘之列。任其行止自如。所有軍器行李。概行給回。爲此次臨陳戮力之獎。五軍營醫士。宜隨同病卒。以便調治。所有相待之禮。一準普營醫士。六所有城中章程。宜俟隨時酌改。七以上各款。或有疑慮之處。未及明言者。皆視爲有益於法國。二十八日辰刻。巴彥按籍稽兵。出城降普。未正。法兵始釋軍械。初立約刻期十二時。後卒踰期。其不卽遵者。因兵士內亂也。撫諭再三。衆情始定。將遣兵士至普營。巴彥登壇告衆。以與之別。曰。嗚呼。今日者。事不可爲矣。必不得已。將出納降下策。此於戰例有之。不足爲病。昔者如馬心諾。急里白。高温。勝西亞三人。皆桓桓武士。矯矯虎

臣。所統軍旅。無非精銳。然至大勢一去。猶且納款稱臣。甘爲降虜。誠以相機宜。揆時局。英雄之所不廢。豪傑之所自保。雖暫屈於一時。終可建功於後日。故此三子者。武功震耀。彪炳史冊。聲名越至於今。亦何足爲盛德累哉。我儕今日。遭會時艱。遭逢厄運。亦與之相同。且也。智勇俱困。心力交瘁。天時人事。大略可知。卽使納土獻城。亦不至隕名實。損威重。爲國家辱。貽我黨羞。浸假尙有良法。可免於降。豈不甚願。然而必不能也。突圍陷陳。非一次矣。重閉深阻。安能飛越。卽欲捐軀於戰鬪。畢命於疆場。以冀倖乎萬一。而敵衆我寡。敵逸我勞。敵強我弱。敵盛我衰。空殞一身。無裨國是。須知此一身者。上以宣力朝廷。下以報效知己。所繫非輕。奚可徒死。嗚呼。火陳

刀林蹈身無所。深坑高壘。置足何方。徒苦我軍。何損敵國。今望爾衆。堅乃心志。立約守盟。知事機之莫挽。甘逆境。其如飴。勿毀我器械。勿墮我城垣。克循戰例。盡繳敵營。嗚呼有衆。自協副偏裨。總長弁目。咸聽我言。戎馬久勞。雄心尙在。茲將言別。曷任傷懷。勗哉夫子。幸毋忽矣。相見有時期。後日矣。三軍聞之。咸爲流涕。二十九日巳正。普第七路軍將沙思都羅。據守礮臺。未刻。法國御林飲飛軍。自蔑士出。齊執鎗械。行列整肅。至富律士革地。始釋鎗免冠。過郡王前。餘兵則先繳械於軍器局。而後盡遞解日耳曼境。散處各地。普軍見御林軍。頗加優禮。無出一言以誚之者。是日申正。普軍入城鎮守。所遣撥者。步兵兩旗。騎兵一旗也。由是蔑士屬於普。當出降時。

士人無不憤怒激烈。有一旗長。告其下曰。甯死勿降。旁有郵報主筆之士。曰。阿耳伯嘉靈鄧者。忠義士也。爲人慷慨有大略。亦曰。此時普人必不及備。盍以鳴鎗爲號。乘機突襲其營。必可走也。後其謀卒未成。是夕。城中會堂鳴鐘。皆作虞殯之音。以示哀也。婦女奔趨衢市間。有自捽其髮而裂其冠者。偶遇於途。則相謂曰。如余子女何。何適而可。蓋寸心無主也。軍士脫帽露頂。斃蕙而行。狀若小兒。號哭無常。忽矍然四顧曰。蔑士昔固雄藩。今何不幸至是。一旦而失之於敵。法國已矣。無復望矣。文官等彼此相值。卽相問曰。孰爲吾主。將往何方。喪敗光景。奚堪寓目。其一時愁慘之象如此。蔑士所降將士。其數如左。大帥三人。將軍六十六人。統兵官弁六千人。軍

士七萬三千。此外軍餉一百六十萬磅。大幟五十三桿。三帥者。一巴彥。爲主理軍政者。一切歸其節制。後往加須兒。見法王。旋即攜眷屬。避居亞士刺式兒。一堅拉白。見法王後。往士德吉寄居焉。一利布父。亦兼軍師之職。見法王後。旅於般地。諸將中有大將三人。法國之著名者也。一富魯實。一布厘西士。一王子妙律。此三人往見法王後。卽居於加須兒。蓋普王從法王前日所請。凡納降將帥。皆必往謁法王故也。當巴彥之行也。乘車經蛙治鄉。鄉中婦女聞其至。群立俟之。見車至。卽唾罵之曰。賣國猾賊。無識小人。有何面目。復經此地乎。又謂之曰。汝誑吾夫。往何方乎。汝鬻吾子。還何日乎。奮拳擊其車旁之牕。破之。普軍在側。彈壓始止。普郡王既受蔑士之

降。傳檄三軍。徧加獎勵。其告衆之詞曰。嗚呼我衆。糾糾干城。猛毅無雙。所向克捷。今者拔堅城。俘巨衆。獻軍實。搴敵旗。建此大勳。爲國之光。凡我三軍。莫不踴躍用命。罔憚艱險。用能克奏非常之巨績。爲國家創全勝之大局。咨爾衆士。蔑士既服。將定南方。不日拔營。分道並進。謹謝爾衆。勗哉夫子。普郡王命第七路軍將金麻。統兵鎮守蔑士。其餘馳赴大營。後再聽遣撥。普王子聞蔑士捷音。卽詣御營祝賀。奉觴上壽。降信既達。普京無不額手交慶。十月二十八日。普后以電報傳書於郡王曰。我爲汝賀。克建殊勳。惟汝勇略冠三軍。嘉猷邁群辟。勝算奇謀。操之在握。所以將士樂從。聲名爛焉。美哉戰績。宏多。洵足以炳史冊。而勒旗常矣。尙望詳陳前後方略。俾

知梗概。十月二十九日。普軍將入城。道經滿貼士。見法兵五人。偃斃於途。景象蕭瑟。殊不忍觀。十月三十日。普郡王整肅行伍。入蔑士城。旌旗蔽日。金鼓喧天。軍容之盛。真如荼火。其人皆雄毅威猛。不可逼視。時法軍之旁。迓者皆多憔悴可憐之色。彼此相形。頓區霄壤。普軍既入境。卽以預備之糧。分濟法軍。凡前日普軍之被俘在城者。立釋之。然亦不過數百人而已。自八月十八日。以迄納降之日。城中人死亡者四萬二千。日耳曼郵報云。此地本日之舊疆也。今得仍歸故主。亦循環之理使然耳。法自取此土。輿圖益廣。國勢愈雄。所以凌制日耳曼者。實恃乎此。今日既得而復失。俾日藉以保固其邊圉。謂非天道哉。三百年中。倏而屬日。倏而屬法。倏而由法。

而仍還諸日。自造物主視之。直不過旦暮間耳。子輿氏有言。曰。固國不以山谿之險。信哉。法京聞蔑士之降。廷臣震怒。無不以叛逆目巴彥。咸謂巴彥通敵輸情。殃民誤國。卽尸之市朝。猶不足以蔽辜也。遠近郵報中。譏議巴彥者。紛無定說。諒之者謂其情迫勢窮。誅之者謂其畏死求榮。此皆不具論。惟法京自聞信後。內亂忽作。居民騷擾。不知所出。久之始定。巴彥前鋒巴耶將軍聞之。致書於郵報總局。刊示大略。自明獻款出降。迫於不得已耳。糧絕援窮。卽復嬰城併命。亦徒出於一死。於國家初何所補。不如暫存一息。再作良圖。區區之心。夫亦欲得當以報朝廷耳。別國日報主筆之士亦謂。巴彥僅齎三日之糧。擁二十萬之衆。而堅守至七十日。亦可謂能

矣。特其當普郡王圍兵甫合之時。麥馬韓方以全師相救。彼援此應。聲勢或尙可聯絡。不乘此時併力北向。爭先斫陳。事猶未可知也。至於食盡師疲。殺馬享士。然後慷慨流涕。誓師求出。則已晚矣。是則巴彥者。雖非謀國之不臧。究由人事之未盡。以此責之。當必無辭。至於或謂蔑士之粟。足支十年。軍局礮臺中。爲普軍覓得餉糈無數。要皆譫言之妄傳。不足爲信也。或又言蔑士尙有外援可恃者。則指法之褒巴奇將軍言之。時褒巴奇尙在都華。擁衆守城。觀釁而動。故蔑士之兵。日望其來援。得以離重圍。而出深險。然非褒巴奇力之所能至也。或更言巴彥名位既高。深居簡出。軍士罕見其面。其不能深得兵心。率由於此。諸帥中。惟堅拉白。最和易近人。爲

三軍所愛戴。軍中每爲之語曰。威父堅拉白。阿擺巴彥。威父華言壽考也。阿擺華言墮落也。觀其所呼。大略可知矣。論者謂普法用兵以來。雖奏大捷。然未有如蔑士之降之關乎全局者也。師丹之降。僅擒王。蔑士之降。幾覆國。嗚呼。所繫顧不重哉。議者徒謂蔑士既失。法京望絕。以蔑士爲法京之屏蔽。而法京之鞏固。遠不如蔑士之險阻也。此猶淺之乎所見也。當日者。普人懸軍深入。以門戶之險。獨以委之於一郡王。而君臣將相。併全力以攻法京。其志則大。其謀則疎也。何則。進圍法京者。不過四十餘萬之衆而已。此外犄角者。別無精騎勁旅。俾數大將。統之以爲援。此所謂孤兵也。以孤兵而攻人之國都。可勝而不可敗。一蹶不復。非燿則覆。此兵法之所

普法戰紀卷六
備道館
忌也。然而卒以濟者。此其中蓋有數存焉。况法此時王雖蒙塵。國猶未弱。法京守兵五十餘萬。屯於魯華河者約三十餘萬。而北方之雲集響應者。又不下十二萬。益之以阿連郡外精甲數萬人。以是計之。法兵殆將百萬。其駐兵境上者。又有法將褒巴奇。以大利將加厘波地扼險據要。伺隙而發。夫以法京之大。豈能遽下。攻拒相持。必至師勞力竭。郡王以二十萬衆。牽制於巴彥。何暇西顧。設使法人內外南北同時合擊。則勝負之數未可知也。乃蔑士之降。正不自其先。不自其後。而適當普王攻圍法京之時。於是內師不得遽出。外兵不得遽集。而圍蔑士之軍。反得卷甲束馬。鼓行而西。以翦遏其援兵。掃除其旁郡。普軍師毛奇始得調麥連畢公爵之師。以

攻其南。遣蠻雕飛兒將軍之兵。以擊其北。浹旬之間。兩軍俱潰。而法京於是乎危矣。嗚呼。此天授。非人力也。固不得盡爲巴彥咎也。然使巴彥從容誓衆。稍緩須臾。則南有波刺巴刺顛。北有扶里地沙。三將相連。聲援遙應。勢力未孤。普雖善戰。恐無能爲。法之敗北。當不至若是之甚。則亦安得辭其咎哉。千載而下。尙論者恐不能爲巴彥恕也。嗟乎。自來。失機誤國。所爭者原不過毫髮間耳。觀於此。則知所以用兵矣。十月二十八日。法人由巴黎斯京師出。攻屯踞李波節之普兵。勝之。遂復其地。撥重兵爲之鎮守。先是普軍之圍法京也。先取法京外附近邑鄉。以結營壘。聯絡聲勢。李波節地在聖顛呢士之東。固法京外之要隘也。爲普法所必爭。至是法復得之。

盡逐普軍出其境。勢爲一振。十月三十日。普國選步兵數十隊。突至攻擊。普兵甚銳。無不以一當十。遂擊退法軍。復據其地。陳擒法兵一千二百人。統兵員弁三十人。而普軍之死傷者甚衆。是日。棣桑城爲普軍所攻。甚急。法人列陳出戰。兩軍始交。鋒銳無前。轉鬪至三時。有半。法軍敗北。其城遂爲普兵所取。蔑士既降。普人留第七路軍爲戍兵。而以琛麥將軍統領之。鎮守其地。其餘兵衆皆往北方。蠻雕飛兒將軍率第一路兵。進攻那文地。郡比嘉棣郡布烈丹尼郡。別將率兵六千圍法之朗威邑。薩慎尼王子統第四路兵。進取美思亞城。留守蔑士之兵。兼攻泰安威兒礮臺。惟調第二路兵之第二枝。往圍法京。餘皆調往法國南方。左接瓦得將軍大營。右連

丹將軍屯所。聲勢互應。此外大軍二十有二隊。普軍師毛奇將調至法京。特恐法人知而設備。潛遣壯丁。邀擊於半途。故揚言將留屯囊棣。使其不虞。華西路有第四隊普兵。已向法京進發。普郡王駐營於多來。在多來山谷之間。法之戍兵散布焉。見普兵驟至。悉奔竄。普軍逐之。至瑞士國境始止。蔑士既降於普。法京民人。知之大亂。十月三十一日。法人富洛伶。率群眾闕於朝。問蔑士何以失守。巴哲即李波節別名。何以敗北。爹亞勸和。何以不成。暫行息兵之舉。何以不果。統領德祿蘇。遣人將前後情事。一一告之。衆聞之。益不悅。時聚者愈衆。廷臣咸往。惟利院中。籌議軍政。惟利院法京中大酒樓一名豪參兒威厘。時往者有德祿蘇發孚多厘。宴加拿卑治朝兒士西門朝兒士父厘譚美沙將軍。

麥年方環坐於一席。權商得失。衆亦踵至。擾攘於街衢間。忽聞鳴鎗聲。衆謂其恃火器殺人。譟益甚。一時喧聲鼎沸。廷臣始禁。民人毋輒入院中。然終不得阻。不期而集者無數。踵趾錯遯。肩背摩擊。幾無可容之地。富洛伶突至廷臣前。亂民左右擁衛之。堅請廷臣辭職。當另簡賢者。以主國是。廷臣咸不應。花厘起勸衆民。但群聲譁甚。不聞其所言何語。一亂民以手擊西門耳。數亂民踞坐於几席間。德祿蘇手摔其足。使之仆地。亂民中有曰。宜先縛若輩。無使一人得逸。發孚厲聲叱之曰。我儕以何故辭職哉。衆聞益怒。有童子年約十五齡。呼於衆中曰。老而不死。戀職何爲。旋西門麥年父厘潛逸去。發孚俾治譚美沙。以衆目所屬。不得避。富洛伶問於民曰。汝

衆欲逐此廷臣。無許在位乎。民皆踴躍歡呼曰。固所願也。於是逕前執諸廷臣。將幽之別室。德祿蘇已受縛矣。潛有緩之者。得逸至外。遂統兵來援。擒治匪黨。於中有非立士卑押馬麗士遮禮周耳威利四人。爲首亂。循莠民例。痛懲之。翼日下公舉之令。因德祿蘇之爲統領。民間謂其自立。非由推選也。十一月三日。國中公舉德祿蘇及廷臣者。凡五十五萬七千九百七十六人。別本云四萬六千八不從者。六萬二千六百三十八人。別本云約四萬九千人頃之護勇入朝稱賀。以公舉之數衆多。而爲朝廷慶得人也。德祿蘇爹亞徧諭將士曰。今有誓願於此。斷不肯以尺寸之土割畀敵人。以負群情之仰戴也。衆皆起立。齊言曰。我儕咸同此心。所云巴哲之敗者。以其地爲普所取也。巴哲

爲法京外之屏蔽。普得之則可屯軍駐衆扼制出入。先是十月十四日。法人遣兵八百往援。與普軍戰敗焉。喪亡俘擒者五百人。十月二十八日。法將俾利麥率兵一千五百突出。不意襲攻普軍。時普軍守備未齊。遂爲所克。普軍既出城。糾集餘衆。翼日驟至。奮力環攻。仍下之。十月三十日。普軍二萬人據守其地。十月二十九日。法將褒巴奇屯營厘梨城。檄諭其地兵民以激勵之。檄云。茲承兵部大臣命。授我今職。統領北軍。爲半壁之藩籬。作一方之屏障。其任豈淺鮮哉。惟望汝等鼓勵雄心。奮發義憤。用輔翼予。今也。時值阡危。地當衝要。非收群策群力之效。必不爲功。余苟非倚藉於汝等。曷敢肩此艱鉅。余今招集新軍。訓練之。以成一軍。將使之奮馳於疆。

場捍禦於礮臺。俾得鎮守此方。藉資鞏固。我於平日間。自矢竭忠盡力。以報國家。至今日正我致身效命之秋矣。臨危則必有進而無退。遇險則必有前而勿却。務期於摧挫敵鋒。奮揚士氣耳。汝等可共觀之。嗚呼。汝等要當同心壹志。戮力和衷。拯我一國之顛連。洩我今時之忿恨。偕我共建大功。彼此相需。勉之母忽。普軍屯駐於亞棉及魯宴火輪車路。克蘭威刺三處。普軍一千二百人。欲割毀亞棉魯現之鐵路。法人知之。突出相攻。擊退普軍。普之卑電軍。建營於卑申干。法人驟至擊之。普軍敗北。陳亡一千二百人。逐出其境。餘三百人遁入瑞士國界。盡釋其器械。法廷諸臣。檄諭地方官。密遣偵諜。設善法。以探敵軍舉動。法軍散屯於那治士門得倫兩地。

特撥瓦添勃軍飛騎圍之。大敗法軍。陳擒六百人。奪獲墨迭兒魯士礮無數。普軍師毛奇行軍制勝。出奇無窮。不惟於攻守戰禦。籌畫悉精。卽至運糧一節。尤多妙法。大軍所至之地。所需無物不備。所部數十萬衆。每覺糧餘於軍。此雖假力於輪車。資速於鐵路。而自普至法。深入敵境。累經險阻。設有不虞。將士奚賴。乃今運道晏然。往來無阻。百凡充牣。無異乎取諸宮中。蓋其所以保衛此運道者。別具匠心。俾敵軍自不敢竊發。曩之戰於瓦士時。法將麥馬韓。方以餉糈不繼爲憂。而普營中芻茭糗糧。累積如山。未嘗不嘆居者之不足。而羨行者之有餘。深服普軍師之用兵。爲不可及。英人聞之。特遣知兵之士二人。前赴普營。考究其法。論者謂行兵韜略。出自

心裁。當其未施行也。雖密寄腹心者。亦無由推測。而何有於局外。至於運糧一法。尙屬顯見。一經能者之心。自可仿行。八九。况行軍要欸。首重兵食。英之留心於此。實爲切事。據其麾下將士云。軍師兵行始末。出師制勝。悉中要害。無一虛著。運糧特其一端也。十月三十日。爲普軍師毛奇七秩生辰。普王以其功高望重。特賜伯爵。以獎之。俄主亦以勝佐治巴圖魯。郵賜毛奇。用酬其赫赫之勳。是級貴重莫匹。爲俄國武功極品。自伐法以後。普俄兩國。甚爲輯睦。俄主獎重臣。以貴爵。恤戰士。以重賞。用以交歡於普。又特拜普王子。爲統領俄國兵馬大經畧。以數十萬軍。歸其節制。向時與普交界處。有波蘭等三郡。總督與普不和。疆圍之間。遇有彼此交涉事。時

有責言。今俄主特斥去之。以敦普好。蓋兩國之歡心。至此愈固。議者以爲普俄之意。欲結兩大以縱橫於歐洲。其志非小。斯時西歐雄國。法已不競。惟英足與抗衡耳。按普王子在其國中。無人不愛戴之。以是頌聲載道。咸樂爲之用命。其文人學士愛之者。以文才俊逸。學問超群也。武夫猛士愛之者。以韜畧優長。材武邁衆也。更有孱人病卒亦愛之者。以其親同甘苦。躬自撫循也。普王子體貌奇偉。長身玉立。隆準而深目。目光如飛電。鬚不甚長。多繞於頷下。人謂欲相王子者。觀其準可以知其志。觀其目可以知其決。誠所謂天挺異人也。法國老臣爹亞。由多亞城啓行。前往法京。由法京往華西路。普王大營。承歐洲諸國命。立暫爲息兵之約。法廷諸臣於割

地一說。堅持不可。日耳曼人之旅於異地者。亦以普人索取兩省地爲非。是惟英力爲居間勸法。有可出於和者。不妨謹如普約。但求無損乎國體而已。爹亞之初入普營。十月三十日也。是日謁見普相俾思麥。普相於周旋晉接間。意度撝謙。禮意優渥。初謂爹亞曰。法京廷臣遭亂民之逼逐。群已解職罷歸。果有之乎。爹亞曰。此乃道路之傳聞。非實事也。法京民人。忠信可嘉。義勇素著。反側之事。斷勿爲也。今者不佞來謁之意。欲求貴國暫爲息兵。俾敝邦遴選人員。集議國會。推舉朝廷爲民之主。然後議和罷戰。有所主持。普相曰。聞之法國降帥。欲於加些兒。議立朝廷。俾主和議。爹亞曰。法國拿破崙之朝已終。彼已棄位失國。豈再望其復辟。普相曰。此法國

內事也。我雅不欲預其間。所願聞者。息兵條款耳。爹亞曰。請先舉其大目。一息兵限期。宜定久暫。於普軍所據之地。亦行公舉。悉循一例。二兩國兵士。仍據守向日營壘。無踰界畔。三法京糈糧。許其自行供給。爹亞之意。以爲此三款可成。則其餘皆易耳。初普相亦以爲可。因定首款。爲息兵二十五日。次款中。有所躊躇者。則普相以爲。如在亞魯西士及羅連省。亦行公舉。或有從中播煽民心。惑亂衆志者。必得爵紳前往。代達其意。則亦可以不拒。於是次款亦在準行。迨議及三款。普營將帥。辨論紛然。普相乃檄諭各營。集衆公議。然後裁定。諸將帥曰。法京地廣民衆。城堅池深。圍之未能遽下。攻之不可驟拔。所恃者。在杜其接濟耳。今息兵二十五日。聽其運糧。

入京。一切勿問。則儲積既富。拒守何難。和議成否。尙未可知。而此一著。已爭其先。隳軍實而長寇讐。斷不可許也。於是普相意動。籌商三日。迄無成說。越三日。爹亞入謁普相。復申前論。且曰。必以食濟法京爲要。我所請者。亦不過一月之糧耳。普相乃以諸將帥爲詞。因曰。暫爲息兵之約。大不利於普軍。消壯志。隳銳氣。後不可以復戰。無已。請以法京外之營壘。畀我。則法京之糧可入也。爹亞亦持不可。普相曰。我所謂營壘者。原不過礮臺而已。非有奢索也。爹亞卽作而對曰。議之不成。天也。尙何言哉。不濟兵食。則絀一月守禦之備。而自速於亡也。必索礮臺。無異於舉全城。而拱手讓人也。於是議卒無成。爹亞既出。卽條列所議款約。及辨述諸端。郵寄歐洲諸

國十一月五日。參亞遂辭普相而還。當出普營時。遇一普之統兵員弁。與之促坐傾談。藉以發洩其胸中憤懣不平之氣。參亞因曰。我已竭智慮。盡思維。設法以圖免此戰事。惜乎其終不能也。當用兵之始。我已逆料有今日之敗矣。普官語之曰。先生既以戰爲非。不阿法廷之意旨。何爲於一千八百六十四年間。屢勸興兵攻日耳曼乎。參亞曰。此事誠有之。汝亦知前後異情。今昔異勢乎。昔者日邦理曲。我國理直。理直者氣壯師雄。理曲者反是。况其時上下未至於離心。兵民未至於解體。能興大役。足當大敵。所以我欲急於一戰也。有此前日之勝。必不至有今日之敗矣。今也不然。民心渙矣。兵力沮矣。揆之於理。則又不足。我王徒以輕聽婦人之言。而妄欲

啓釁構兵。遂至棄鄰好若弁髦。視干戈如兒戲。蓋我后懼其子不得立。恐一旦山陵崩。則國位將至他屬。知國人之喜於耀武也。故使之建功於國家。以結衆心。然後布告廷臣曰。我子年雖少。而嫻於軍旅之事。後來克膺厥祚。當不至隕越貽羞矣。嗚呼。此心私也。非公也。所以卒至於敗也。不然者。我國名將如林。胡爲一蹶至此。以我所知者。麥馬韓爲首。而巴彥居其次。巴彥雖雄姿傑出。然安得及麥馬韓哉。如麥馬韓者。可謂之仁人義士矣。當我王乘輿之退駐師丹也。廷臣欲遣麥馬韓援巴彥。此計殊左。我曾再三力諫。奈不從何。要之國運將屯。然後人謀之不臧。隨之。至於貴國之人才。不佞知之稔矣。若軍師毛奇者。智勇韜畧。蓋世無雙。求之當今。疇其

匹哉。其用兵也。不獨長於爭城掠地。戰勝攻取。而尤以撫綏士卒爲先。其善待統兵員弁。愛惜若一體。所以能得其死力。樂於赴鬪。擐旗斬將。一往無前。此所以能一月三捷。卒建大功也。至於我國之行軍。上失天時。中失地利。下失人和。三者無一得焉。前任兵部大臣利布父言。舉國將士。今已整集。此非欺人。實自欺耳。我今者不憚艱險勞瘁。崎嶇於山嶺之間。竭蹶於輪蹄之下。力欲爲我國挽逆境。闢亨途。下令國中。公推紳士。籌立和約。以紓國患。所舉終不能成。此天意非人力也。夫復何言。爹亞因偕普官。且行且談。送之至普營外。然後別去。爹亞行近法京。見其氣象愁慘。不覺淒然隕涕。爲之感歎。歔歔。既而椎胸大呼曰。吾心憂深哉。哀甚矣。嗚呼。我不

勝爲此不幸之京師。痛恤不已。今者危迫困窮。至於斯極。莫之能救。傷哉。爹亞於是役也。僕僕道途。往返於普營。法廷之間者。凡六日。是日已正。法外部大臣發孚偕雕哥律將軍。往西華橋。以俟爹亞回。頃之見爹亞。權一小舟。輕若一葉。由普營中出。其舟駛行甚捷。須臾至前。發孚雕哥律執手迎迓。互相勞苦。爹亞出袖中所論條。欸示之。備述息兵之約不成。相與咨嗟太息。至於泣下。七日。爹亞往多亞城。先是議和息兵之說。皆英爲之調停。於其間。十月二十日。英國總理衙門。致書駐劄普京使臣羅負得士。令其卽將是書。轉呈普國朝廷。以爲勸和地。其書略曰。普法兵禍之興。於今四閱月矣。奮攻苦拒。幾欲決存亡於一戰。我朝廷爲之深憂隱痛。所不待

言前者軍鋒未交。曾力勸其止戈弭釁。奈兩國俱不能從也。自爲局外之國以來。亦嘗殫心設法。爲之排難解紛。議和講睦。誠不欲兩國之久從事於兵革也。歐洲之例。凡局外之國。有首出師以助戰者。則列邦亦必接踵俱興。聯鑣並起。從此干戈迭擾。戎馬俯張。兵燹之災。當無已時。誰爲戎首。肇此巨端。且彼此相持。勝負猶尙未定。若能釋怨修和。永敦輯睦。則我朝廷之欣喜屬望。當無有過於此者。自普法之構兵。我朝廷居間勸和之念。未嘗一刻去諸於懷。苟有機會之可乘。無不隨時以進說。至於和款所繫。務得其平。凡主持和議之大局者。無專利無偏損。無失檢於臨時。無缺望於異日。故前已請普國首相俾思麥。法國外部大臣發孚。各陳己見。和衷

酌議。惜以意旨之參商。遂致衷懷之疑沮。而所論卒未底於成。普自用兵之始。卽已先聲奪人。前後奏捷。不可數計。茲者法京被圍。普軍雲集。其意在長圍深阻。使之坐困。矢亡援絕。糧竭士飢。然後以巨礮飛銃。環轟迭擊。懸揣後來當難設想。普之駐英使臣賓士多父。曾於十一日。轉呈普國朝廷之書。謂爲勢所迫。戰非得已。今者再當秣馬厲兵。以與從事。恐此役也。法人之顛踣於飢寒。轉徙於溝壑者。必當千萬計。據其所告。殊駭聽聞。其所以扼困法京者。當非一朝一夕之事矣。用是我朝廷力與周旋。冀免斯禍。兩國嫌釁已成。雄雌互角。若再久爭不釋。則匪獨繫於兩國之利害。卽於歐洲大局。亦有所關。我朝廷於此。亦惟有力陳條略。切望聽從。盡其所

以待友邦之道。俾兩國不致疑於其間而已。蓋我朝廷所言者。悉本至誠。爲兩國目前計。卽爲兩國日後計。不徒求一得。而務出萬全。以此兩國者。皆我婚媾唇齒之邦。夙所相厚者也。夫擁百戰之勁旅。乘屢勝之餘威。其氣方張。其勢方銳。固不難投鞭魯華。以斷其流。立馬卑斯。以略其境。駸駸乎吞多亞。而平巴黎矣。雄辯高談。惟所欲逞。然自局外而觀。極意經營。固不如處心平恕也。夫杜接濟。施礮石。雖前此之所未有。而亦兵法中所宜行。但如普相所言。則不獨毀城垣。躪禾稼。焚屋廬已也。必至伏尸百萬。流血千里。屠人若草芥。積骨等邱陵。殊爲可驚可愕。論者咸謂。此等舉動。必至於法盡術窮。迫於萬不得已。始可行之耳。圍攻法京。卽可驟行得志。然

苟以目前之利。與日後之害相較。則殊有令人不欲者。我朝廷屢欲以此意達之。普王之前。致之諸臣之側。固已久矣。三閱月中。兩軍角陳。衝鋒。彼攻此禦。勢崩雷電。聲震山河。傷亡之慘。已不忍言。設使蹙法國。破法京。歷代繁華。一朝灰燼。異日法民。追念京師蹂躪。至於如此。烽燧盈郊。死亡蔽野。人民蕩析。老弱流離。更念及物產凋傷。藝術歇絕。奇珍付於一炬。環寶散諸他方。則必有嚼齒穿齦。裂冠指髮。彎弓南向。荷戈前驅。以誓雪此耻。願比死而一洗之者。報復相尋。必無甯宇。况以此時創巨痛深。於法國固幾將顛覆。於歐洲亦有碍昇平。普國在上之人。尤當於此深思而顧慮焉。法國朝廷。執持已見。總理外部大臣。發孚與普相俾思麥。會議之後。徒托

音法戰紀卷六
空言無裨實事。今我朝廷所以請法國與普立暫爲息兵之約者。原使法國得以公舉人員。集赴國會。和衷籌議。結好言和。已告法國有可以無損國體者。即便從之。倘疑我朝廷居間之言。必無一驗。當必不然。今日兩國之戰。法屢敗。普屢勝者。豈無故於其間哉。誠以行軍之道。所以助威作氣者。在乎理直而已。情正而已。普之興兵。特曰禦外侮耳。迫而後應。非樂戰也。則師出爲有名矣。而遂以此致克捷。基富強。夫豈偶然哉。今使普王委曲以從和議。約款一秉至公。設再不成。然後進攻法京。亦未爲晚。俛異日書諸史冊。謂普之攻法。實非得已。立約章程。無不按時度勢而行事。則於普爲有光矣。我朝廷勸和之舉。悉斟酌權宜於兩國之間。無黨無偏。惟公

惟允。所望歐洲列國。咸相聞知。普相俾思麥有云。若久困法京。必丁巨禍。我朝廷用是不忍坐視。盡友邦相愛之誠。切隣境相維之義。敬陳管見如右。再四思維。冀有所當。消弭禍患。感召福和。是所祈於荷承天寵者。書至不勝翹矚。十月二十八日。普國首相俾思麥。致書於駐劄英京普國使臣賓士得父。令其轉呈英國朝廷。蓋卽以答英國總理外部大臣前日書也。其書略曰。英國總理外部爵臣克蘭威兒。所致駐劄普京英國使臣羅負得士之書。已轉行郵示。英國總理爵臣之意。欲速於議和。弭此巨釁。不施絕計。以創法京。我王聞之。不勝嘉尚。蓋我國雖屢經奏捷。而彼此相持。人物傷殘。均所不免。所以速成和議。其有益於兩國者。實過於局外之國。以

彼僅屬旁觀焉耳。英欲請法國遴選人員集赴國會。籌商以爲議和之先聲。此與我朝廷意見相同。聞法京自九月四日以來。時存此念。謂有機會可乘。卽當速行是舉。前因英國所請。我王命我在燕邑與法臣發孚會議。令其選人赴會。先於花厘亞立暫爲息兵之約。斯約所索。至爲持平。觀於土魯城士打拉士卜城。皆於數日間相繼而下。卽可概見。乃法國廢之。迄於無成。法自立爲民主之國。我王雖未許之。然於十月二日公舉之令下。凡經我軍攻下郡縣。我王皆頒詔宣諭。准在內法人一體公舉赴會。是我國於法人公舉一事。但有助之。而未嘗阻之。特法京朝廷自不准國人公舉耳。公舉之期。始定於十月二日。此法京所議也。繼移於十六日。此多亞

城所改也。嗣後并將新都改期公舉之示。亦行刪除。其刪除公舉之諭。已詳載諸郵報。朝臣簽名原稿。適入我手。而又緝獲法國總理內部大臣監必得之書。書中明述法國朝廷意見。今卽將是書轉行郵寄。我國雖具有見聞。而不敢一阻之者。懼分其謗也。由是觀之。伊誰之責。蓋有攸歸矣。局外名望之人。至法京勸和者。我未嘗不乘機諷諭。令其力解亂緒之糾紛。無至空言而鮮補。故於所請息兵暫約。公舉日期。無不曲從。并許國中之人。入集法京。京中之員。出使他國。從容商酌。務期底於必成。十月九日。局外各邦。以此告諸法廷。不蒙聽納。而居間者。遂大失所望矣。嗣後監必得乘氣毬。出自法京。檄諭各方。令停公舉。雖法國刑部大臣克厘苗士。力欲

贊襄成事。竟不可得。揆此情形。拒和梗議。墮約逆勸。其在我國耶。其在法廷耶。恐彼不得諉其過也。是以我朝廷於十一日。移文局外各國。謂若再久戰。致法民有流離死亡之苦。我國不任其咎。此亦持平之言也。英國睦鄰誼切。代爲殷憂。我朝廷早已逆料及之。夫以法廷之力。拒如斯。則將來結局。必當如上所云。我國亦不勝爲之悽惻。所望局外諸國。勸其捐成見。泯私心。恤物力。保民命。言歸於好。設或不然。惟有靜觀其敗而已。蓋彼法廷諸臣。據舊京。遷新都。稱自主。僭國權。罔顧人言。屢違衆論。茲丁巨禍。實自取耳。若使英國朝廷。能爲之居間開導。令其不蹈覆轍。克循約言。全壯麗之名都。復盛強之郅治。列郡不至於蹂躪。比戶不至於流亡。則我國之

所以感激圖謝者。豈有涯哉。嗚呼。彼法廷諸臣。自私自利。於英國朝廷。勸解美意。從而誤會。我國於此。實不能無憾。蓋彼視局外各國。居間進說。不以爲相勸。而以爲相助。遂至局外之慈衷。適長局中之厲志。悍然罔顧。格不相入。我朝廷因其若此。故於英國爵臣書中所云。勸和之舉。不欲倡首。夫我國區區之誠。固欲敦和好。永輯睦。與法國共享夫昇平。苟法國有所陳說。我朝廷無不樂從。以爲立約議和地。敬以鄙論。達諸英國爵臣。俾知我朝廷意旨所在。臨書不盡欲言。十一月八日。普相行文於駐劄各國公使曰。法國大臣。參亞。與其護國廷臣。商前詣大營立約。我奉王命相迓。十月三十日。未接見之前。參亞先往法京。十月三十一日。乃蒞我營。夫以參

音法戰紀卷六
亞名望素著。才智絕倫。繫一國之人心。爲列邦所仰望。我以為是舉也。必可以講好修和。永敦友睦。故盡禮周旋。弗敢失墜。况我與爹亞素所相識。欽崇其德行也久矣。爹亞議和之言曰。今者敝邦。從局外諸國所請。極欲立暫爲息兵之約。藉籌輯洽。惟我王內揆諸兵力。外準諸天時。中權諸人事。知此約之立。實於日耳曼。大有所不利。日軍精餉。運自遠方。利於速戰。而不利於久持。曠日廢時。坐耗軍實一也。蔑士屯駐之軍。利在長驅直入。未下之地。尤貴乘時進取。頓兵不動。坐失事機二也。不獨此也。此數十日中。我國不能多調新兵。前來翼助。而法則得以練兵蓄銳。整厲戈矛。補葺行伍。轉運糈糧。約期一滿。卽可力爲拒敵。是則息兵之約。固有益於法。而

有損於日。雖然我王不敢以己廢人。以一國之私。逆衆邦之請。見法國廷臣馳驅况瘁。意願殷誠。謹如所命。許息兵二十五日。惟望復敦友誼。永睦鄰歡。自時厥後。言歸於好。我於是議分兩軍。駐營界址。彼又以二十八日。爲請亦曲許之。於此息兵期中。以便法廷遴選人員。前赴國會。於亞魯西士郡中。亦任居民自行公舉。我亦不拒。因我意且俟和約立後。再爲裁奪。法軍自此可以無空戰鬪。妄費藥彈。一切得以從容布置。乃我觀法廷當軸者。不以是約爲於彼有益。而必以運糧入法京爲請。然後其約乃立。不甚可異乎。我於時詰之曰。欲濟軍食。將以何者爲質。爹亞對曰。我惟有權濟軍食。而無權議他事。所議者俾民公舉國會人員。共籌和約耳。我卽覆

命於我王。我王深爲歎異。謂大失與爹亞立約之初望。夫爹亞所請者無他。乃欲使我毀成算。棄前功。兩月之圖謀。敗於一旦。三軍之勇銳。隳於崇朝。無異於自始再圍法京耳。法廷不欲公舉之行。此其證也。五日。爹亞回法京。再與廷臣商。我告之曰。如行公舉。我必助汝。惟力是視。子盍圖之。但爹亞與德祿蘇發孚商權之言。我並不聞。彼亦未嘗舉以告我。惟謂我曰。苟不能接濟法京糈餉者。則無容復立息兵約矣。爹亞於是遽離華西路。七日凌晨。遂回多亞。觀此則知法廷當軸者。不欲國中人員。申明衆意。方且隱幸息兵之約不成。故借端妄請。藉以拒局外諸國。夫局外諸國。固彼望其相助者也。是書至後。可卽宣示其國總理外部大臣。委曲以詳我意。

始普相已許暫行息兵。二十五日。至是遂不果。論者謂普相俛思麥之詞鋒。如水銀瀉地。無孔不入。其所以攻詰人者。令旁觀者不得代爲之解。法國當師徒撓敗之餘。不得不激勵人心。爲再戰地。而普相遂以此藉詞責法。謂彼紛紛者。其心實不甘出於和耳。若遽與議和。反以我國爲有所畏慮。故必待至其敗無可轉機。而後約可立。盟可成。以共底於和洽也。其與駐英使臣書所爲反覆辨論者。悉歸咎於法之拒和。然和戰之權。實普操之。法無能爲役也。普勝法敗。其勢昭然。普相遂欲以此掩覆私智。混淆公論。直己以曲人。恐不能也。當爹亞在華西路普營時。普相謂之曰。約雖未成。然法國欲於普軍所據郡縣中。推行公舉之法。亦可從命。法廷諸臣願

和者衆。惟護國統領德祿蘇不可。於是仍諭軍士堅守京師。紛備守具衛禦。多亞新都總理內部大臣檄民復建法國大纛。誓圖勝敵。法后由英國啓行。入抵普境。省問法王於威廉蘇行宮。鸞輿留駐者五日。普王請后偕法王同居。后固辭之。蔑士獻俘將士。爲數甚衆。特撥蘭華部兵。爲之伴行。遞解普國。蘭華兵時將撤歸國中。遞解法俘至普後不復回營。堅拉白利布父皆往加些兒。進謁法王。十一月七日。蔑士將隸普國版圖。有美國日報主筆文士。入蔑士游覽。觀玩風景。其地有那合酒樓。壯麗無比。朗潔宏敞。著名於時。美士入而小飲。則其中法國官弁。濟濟盈座。異饌佳肴。羅陳於方丈間。第同食諸人。意氣均不浹洽。窺其顏色。有似甚不相能者。或離座甚遠。或兩兩相背而坐。聽其所言。

皆談蔑士時用兵事。謂法將帥中多喜利布父。而不喜巴彥。亦有悅服堅拉白者。以是意見不同。議論迥異。或言蔑士諸帥中。當以利布父爲巨擘。以其能得兵心也。後美國文士。屬酒樓主人爲介。覓前鋒至。使導之入法營。謁見巴彥。時巴彥方坐堂皇。指麾將士。微窺巴彥。年約五十九歲許。髮半斑白。鬚髯繞頰。亦皆蒼然。軀幹不甚頎偉。而雄健肅毅。目光如餓鶻。其威外露。或有注視及人。殊可恐怖。既入接見之頃。相待殊殷。禮貌優異。且謂之曰。勞子遠來。亦殊不易。願聞緒言。以啓茅塞。美士曰。願得先聞高論。可乎。敵國雖僻在西洲。而仗義執言。素爲諸邦所欽服。今伯藍大統領。惟欲以抑強扶弱爲務。凡無辜而被禍者。雖在局外。亦思援手。巴彥曰。余已

有成見在胸矣。美士曰：可得聞乎？願聆其概。巴彥曰：必至時始知余所見不謬耳。今監必得以我爲賣國求榮，目以叛逆誅爲貳心。然彼何嘗躬履行伍，身冒鋒鏑而不知有戰陳事哉？我而欲與之辨，適爲刀筆之士弄其文墨耳。我爲階下囚，北向而麗爰書，彼爲座上客，南面而商刑律。是則我豈爲哉？必也緩待異日，然後是非乃定。我之所爲，雖權宜於一時，自可挽回於後日。初非失計也。美士曰：其中深意，可詳明曉暢以言之乎？是果繫於一國之安危禍福，衆軍之存亡得喪哉？納款之謀，當必徘徊審顧而後出之也。巴彥曰：吾誠願與足下盡言之，無隱矣。美士曰：自納款以來，當必與普之將帥日相周旋。其相待之間，禮意果奚若？巴彥曰：普將皆誠懇忠信。

者流也。而普郡王遇我良厚，以我處是逆境，深爲痛惜。且知我之納款投誠，出於萬不得已，非敢有負於國家。或有逞其筆舌而沸騰謗毀者，普郡王許必爲我剖雪。且必爲我保持，毋使我銜冤受屈。此亦足見其厚待之一端矣。美士曰：然則將軍於師丹既北之時，法主蒙塵之後，所有在軍出示，告誡衆士，曾自稱爲民主之國否？巴彥曰：此豈余之所敢出也？若果行此，益足以亂軍心耳。我豈爲之哉？我屢獲偵諜，搜得郵文，知於九月四日，朝廷變革舊章，主持國事者，已自有人。一聞此耗，立卽上書王子，詢問眞僞。王子賜書，旣返，謂消息已眞，事無可說。總之國運多屯，民心已渙，誠非人力所能挽回耳。涕泣作復，不知所云。於時我雖得書，猶未深信，繼而各

地日報。皆述是事。衆口如出。諸一。然後乃知其確然。非我初意所及料也。我於是遍告闔營將士曰。今者法王已蒙塵東去。法后又見逼出奔。王子亦復行遯他邦。不居儲位。所有舉爲護國統領者。乃一德祿蘇耳。然我等爲國守此義。無可去。吾惟盡我職守而已。內之構爭。肇釁。置之勿問可也。因是軍心稍定。凡有法廷推選官員。姓氏。概不使知。美士曰。君洵可爲公忠自矢者矣。特是君之乃心於國家者。可得聞乎。巴彥曰。前者吾之筮仕於朝也。已與法王有盟言。今者雖已失位。而一國之綱紀仍存。此心之忠義固在。卽我麾下諸將士。亦不忍背吾主而事他人。自非與法王改盟易誓。辭職去官。然後可爲他人用。美士曰。今法之新朝。一在巴黎斯。一在多

亞。君曾與之書牘往來否。巴彥曰。有之。凡軍事之鉅細。軍情之洪纖。我皆據直以陳。無有所隱。然彼從未嘗一報我也。美士曰。被圍以來。兩軍相見。曾一獲勝捷否。巴彥曰。未也。夫所謂勝者。必其操必得之權。始終皆足以制人者也。豈徒快意於行伍戰陳之間而已哉。我兵與普軍接戰也。相持未嘗不力。臨陳未嘗不勇。而不知何以終不利於吾軍。嗚呼。此天意也。非人謀也。美士曰。今日者糧絕援窮。困踣萬狀。大抵不得已而出於降耳。巴彥曰。是誠然矣。設使不迫於飢餒。而聞法京有自立之舉。通國有民主之說。則吾亦將卷甲束兵。北面納款於普軍耳。但此事之轉移。所關甚巨。非我一身所能肩承。蓋其中自有主之者。議此者出自軍機總局。我亦惟從

其命而已。衆心不可違。獨斷要難成。上自統帥軍師。下至偏裨將佐。無不曰。今日之事。非出於降不可。然後乃行。豈余一人所得主哉。美士曰。軍機總局之意見。其旨可得聞與。巴彥曰。我試與汝詳言之。汝可識其故矣。軍中糗糧。每日由五百減至三百。由三百減至二百五十。十月九日。精臺守將謂我曰。我軍僅有七日之糧。爾過此以往。難以支持。是日殺馬三百五十匹。以享軍士。五十匹犒勞士人。自十日至十二日。軍機總局籌議軍事。十有四日。勢不可以久處。乃議納款。命巴耶將軍持白幟。往叩普營。見普郡王。面陳意旨。普郡王初欲不許。而後卒允之。美士曰。願聞出降之議。其旨何如。巴彥曰。我誓不再履行陳。與普軍決戰。惟欲調兵齊赴法京。討其

僭位竊國之罪。彼靦然自以爲朝廷執政之臣。指麾兵民。歸其掌握。而其行則有甚於盜賊。此我每一念之。髮指毗裂者也。義旗所指。豈能或緩哉。美士曰。普相俛思麥將何所云。其意何居。巴彥乃出。巴耶與普相所約之言。以示美士。且囑曰。但自覽觀。勿復刊入郵報。傳示衆人。美士曰。唯。據美士云。其計殊秘。未便洩諸於外。惟請師攻法京之舉。普相意見似屬可行。因喜其能興義憤。志在叛人也。獨毛奇堅持以爲不可。恐其中途猝變也。蓋舉十數萬之師。盡委之於其手。一旦反戈相向。誰能制之。卽不然。背其前盟。與法京合兵攻普。普何以當此。無異釋虎出阱。自樹一敵也。

借人之力不威。以垂成之事。讓入得收其名。不智宜乎。普軍師之堅不從也。

巴彥又告之曰。十月十有八日。

按卽使巴彥與普軍合攻法京。則將來破城之役。普不能獨奏大功。分人之功。不武。

軍機總局仍集議事。加芬拿謂我曰。糧罄矣。將奈何。我告之曰。無妨。尙可以支八日。普軍雖強。此間有險可守。猝未能下也。二十六日。將士復集於軍機總局。咸曰。人命至重。死者不可以復生。爲億兆生靈起見。勢不得不降。於是納款之議乃定。蓋自與普攻戰以來。雖降而不。至於損軍威。喪國體者。惟我爲然。以視矜甲面縛。身爲俘虜者。固有間矣。美士曰。若再相持固守。尙復有機可乘。以出此重圍乎。巴彥曰。噫。危迫至此。尙有何機可乘哉。軍中所蓄戰馬。宰屠已盡。將何以運載礮車。爲前隊之先聲。雖欲衝突陷陳。亦不可得。故將士爲之寒心。士卒爲之短氣。束手坐困。職是之故。美士曰。自八月至今。死傷喪亡者。約計若干人。其數可得聞歟。巴彥曰。凡喪

將軍二十四人。統兵官員二千一百四十人。兵士四萬二千三百三十九人。前者戰於磐尼。我已被傷。言時自卸護肩。袒而示之。則其肩傷痕。雖痊。陷成一洞。因謂美士曰。此卽九月四日之戰。爲鎗彈所中者也。若彈入稍深。吾無有今日。獲見法京之人矣。美士曰。十七萬三千人中。能復臨陳。背城借一者。得若干人乎。巴彥曰。大抵不過六萬人而已。但礮兵無藥。騎隊無馬。其何能戰。卽使舍一死以冀必得。而六萬之困卒。誰能當二十萬久練常勝之雄師。出五六重長圍。扼險之堅壘哉。適論至是。而法王之書。自加須兒至。美士遂與巴彥別。巴彥送之曰。汝嗣後可常來。此余有問必答。盡言無隱也。前巴耶將軍之使於普營也。普相俾思麥謂之曰。奔腮將軍

適自法京來。言及法京光景。迥不如前。執政者昏然如醉。承令者昧焉若夢。上下狂易。有如病風喪心。酗酒謳歌。無所不至。吁法京若此。其亦危哉。自普人觀之。謂法人之居法京。其叫囂躁逸之狀。正如猿獍之處於樊籠。我聞是言。知法國之大局不可支矣。尙望汝時至此間。以啓余心。於是美士遂行。論者謂法國蔑士一境。爲邊徼重鎮。固天設之險塹也。而法將巴彥不能守。樹幟出降。竟爲俘虜。聞者皆疑。巴彥隱懷異志。故有此舉。否則普必不能及此也。因是法廷諸臣。群目之爲叛黨。置之不齒。卽鄰邦尙論之者。或爲之設身處地。或爲之略迹原心。有作恕詞者。有作憾詞者。其說不一。未有定評。局外之人。固不能強作解事。妄置議論於其間。特爲敘述。

聯邦文士問答之言。以見大凡。或者巴彥隱衷。藉此可白乎。至於巴彥降後。屢次刊錄郵報。以自剖白者。略有數端。糧絕衆飢一也。天久淫雨。陰寒多霧二也。時疾流行。病卒至二萬餘。無所得藥三也。圍攻以來。臨陳喪亡者。大帥一。將軍二十有四。兵士四萬二千三百五十。士氣沮敗。不可復用四也。雖擁多兵。皆疲卒耳。其堪爲勁旅。足當一戰者。僅六萬五千人。斷不能當二十萬衆之驍騎五也。設使不肯竭忠報國。盡力守城。則於八月中。早爲普所得矣。豈能延至於今哉。說者謂。古人不以成敗論英雄。誠爲千古第一觀。人通論。然亦有因事推求。不能遽作恕詞者。何則。事無可議。則雖出於敗。天下後世猶當起而諒其心。若其大勢。猶可以挽回。全局不至。

於決裂而徒諉之於無可如何。以身殉之。則論者猶將疵其僨事。惜其才不足。而忠有餘。况乎既不能保土。又不能死官。於事尚可圖之日。乃作此義不當爲之舉。則亦孰得而恕之哉。普兵環困蔑士時。有日報主筆之士羅弁臣。亦在圍中。圍城消息。頗得其詳。爲述蔑士之情。巴彥之軍政。良有深可嘆息者。弁臣云。八月三十一日。九月一日兩戰。勢甚鋒銳。可用。無一不思突圍而出。其披堅執銳。捨身犯難之三大隊兵。則爲簡羅弼福薩李寶符三將軍所統者也。初出列陳。行整而氣猛。蕩決無前。有如風雨之驟至。其由西北隅而出者。已占形勝。此時法軍方顧盼自雄。謂出此重圍。亦復何難。不料次日卽已不支。旋而志氣沮喪。不可復振。推其故。由無精

銳驍騎以繼之也。是以雖勝旋敗。既興復蹶。稍經挫折。亟卽回奔。惟其顧而無繼。則胆不壯。而志不堅耳。况乎統率不齊。號令未一。其誰適從哉。當此危急存亡之際。爲大帥者。正當躬履行陳。親冒矢石。爲諸將先。庶有以作士氣。鼓人心。而乃好整以暇。行若無事。惟日酣飲帳中。歌呼自樂。置國計軍情於不問。雖欲不出於降得乎。顧此猶疑其周內之詞。至於命將遣卒。此固巴彥之責也。今卽以福薩獨當一面而論。其計亦愚。蓋福薩麾下之師。前已大創於普兵。其氣已餒。不俟臨敵。已知其無能爲役。苟以敢死之士軍其前。選鋒之兵隨其後。則勝敗之機。尙難逆料。惜乎其計不出此也。是役之後。雖有接仗。皆不足以言戰矣。或言巴彥少攻韜略。長擅將才。

何以大敵當前。一籌莫展。而竟安於重困。是則誠有所不解也。無他以俟機會之來。一念誤之也。不知軍勢若此。危如朝露。幾於旦夕莫保。有何機會之可乘。九月一日之戰。普國之兵威雖壯。而法軍之衝突殊強。苟能揮兵盡出。整隊長驅。則普軍勢難兼顧。未必無濟。奈何令其孤進無援。坐觀挫北也。夫蔑士守兵。其數多於普之圍軍。由在上者不善調遣耳。如護勇徒待補缺。未經補缺之前。斷不驅之臨陳。值茲槍攘之時。豈能復拘於成例。爲上者要宜激發其忠義之心。俾其蹈義不顧。視死如飴。群願殉敵。忘身以期得當。是亦未必不能出也。逮乎蔑士不守。整旅而降。險絕雄藩。竟拱手而讓之於敵。不可惜哉。日報主筆之士。曾議之曰。卓爾堅城。至於失

守。無論其所因何事。但以守者之兵多於攻者。而竟爲所扼。北面卷甲而降之。則其辱甚矣。巴彥於十月二十八日。下令軍中曰。出則必敗。故不得已而降。姑無論雖敗猶愈於降。且又安知出必不濟乎。若巴彥驅傾城之師。齊赴敵營。沛然如河流之莫遏。其勢固可以出走。巴彥既走。則普郡王之師。方擬分投追勦。以綴其尾。何至遽能集攻阿連哉。然則無論降與不降。所關甚大。卽走與不走。所繫亦屬非輕。嗚呼。巴彥之誤國殃民。尙何言哉。至於普軍以寡扼衆。久駐堅城之下。其胆略固屬過人。蓋亦知巴彥之人爲易與耳。嗚呼。蔑士降和議沮。法京圍旁郡失。法之不振。至此決矣。

京師後備軍夫志之不誠至出矣
 人蓋亦厭巴查之人為甚與其
 若至封普軍以真誠禁人雖聖
 與不夫亦樂衣冠非難也巴查
 意謂樂意而意若然則難矣不
 意則夫限普將王公而沈沈
 調齊法通營而然限而高之真
 烟釐愈效制且又受限出限不
 人日不令軍中日出限必限不
 限此非面營甲而制之限其限
 限此非面營甲而制之限其限

普法戰紀卷六

終

校合山田榮造

